

三制

垣府

疏疏

稿草



草疏府制



著 彦 蕭



叢書集初編

主王雲編者五

商務印書館發行

制府疏草

本館據涇川叢書  
本排印初編各叢  
書僅有此本

制府疏草卷上

明念渠蕭

更調守備官員疏



50186

題爲更調守備官員以重汛務事據廣東按察司整飭惠潮兵巡道副使王一乾呈稱防倭之策不外大洋火攻爲上策但兵不在多而在精固要選兵尤宜擇將今之將佐擇之更難職以爲見在事可用者不宜輕聽其去如原任碣石寨把總吳廣其人雖椎魯罔諧於俗然忠肝義膽奮不顧身亦一時材勇之將宜改柘林寨守備管領官兵與南澳副總兵共當一面而慶遠守備或就以周德隆對調此今日選將之第一義等因到臣隨查得接管卷內該前督臣劉某先據惠潮兵巡道詳報倭奪聲息前來議行各道添造戰船募選水兵又慮潮州陸兵單弱行委原任碣石寨把總吳廣帶領標兵前去潮州并該府原陸兵合營團練專備衝鋒業經條議具題去後今據前因該臣會同巡按廣東監察御史王某議照海防以水兵爲先御兵以擇將爲要然擇水將與陸異擇今日水將與恆時又異何者陸將惟其能耳而水將非曾經涉歷且望大洋而目眩神飛也安所用之故擇水將與陸異也人不皆生而習者往時海波不揚猶可僥倖無事漸此熟習而近者島夷之報琉球朝鮮相繼至矣汛且迫矣萬一小醜匪茹其乘風而犯我顏行特頃刻耳故擇今時水將與恆時異也切見粵東諸郡大率濱海而潮爲最濱海武備孰非

險要而南澳爲最。乃柘林者。固南澳腋肘也。此其不可無慣歷水戰之官明矣。近接邸報。柘林守備劉宗漢推陞廣東都司僉書。而繼宗漢者。潯州衛指揮周德隆。尙未赴任。潯州臣彥所兼督地也。德隆之平生。臣彥悉之。其爲人夙慕節義。雅有儒風。以任守備。尙有餘能。顧其生長西粵。出入山嵐。於猺情諳矣。而或昧於海防。於瘴癘習矣。而或怯於風濤。一旦驅之。最要最險之地。其能否未可知也。臣等查得原任碣石寨把總。今新推慶遠守備吳廣。該前督臣選取潮營合練。今方在潮。未得卽赴慶遠。而廣又常任碣石。日出入波濤中。其爲人軀幹甚偉。勇猛直前。雖不無好剛之過。然夙有請纓之心。懲創既久。事體漸習。移之海寨。其能可知也。且吳廣見在湖州。而慶遠之守備久缺。劉宗漢報陞都司。而德隆之交代無期。莫若量才任使。如該道之議。將新陞柘林守備周德隆。調補慶遠。卽以吳廣調補柘林。在周德隆習于御侮。必能作一方之保障。在吳廣勇于防海。必能祛千里之旁氛。駕兩輕車。就兩熟路。不惟兩人各展所長。而兩地亦各得人。於汛務有賴矣。相應會題。伏乞勅下兵部。查果可采。覆議上請。更調施行。地方幸甚。臣等幸甚。

因事激衷懇乞天恩明職掌定經費疏

題爲因事激衷。懇乞天恩明職掌。定經費。以便供職事。臣最不肖。皇上過而使之。承乏兩廣。而時當島夷。浪傳之後。又兵防久弛之餘。奏汛屆期。寢食靡遑。敢及其他。顧以督臣奉皇上命。任茲重寄。而事關兩粵。則職掌不得不明。守在兵食。則經費不得不定。職掌不明。則畏首畏尾。動多掣肘。經費不定。則瞻前顧後。行若疚心。將使後之疑。今亦猶今之視昔。督臣者。且規避不暇。何暇論於繩墨之外乎。臣故不揣其愚。輒

敢列爲二議。上干天威。以俟聖斷。其一議職掌。照得兩廣督臣之設。自正統年始。當其時。事已卽罷。未有專置。至成化元年。則以都御史韓雍提督兼巡撫。而兩省巡撫俱裁。既以雍之奏。則兩省各復巡撫。而專以軍務屬提督。旣以御史龔晟僉事陶魯林錦之奏。則又起韓雍總督兼巡撫如初。而兩省巡撫復裁。至嘉靖四十五年東盜起。則又設廣東巡撫。而以總督兼巡撫廣西。至隆慶三年。西有占田之役。則復設廣西巡撫。裁廣東巡撫。而改提督兼巡撫廣東。至萬曆三年。仍復總督兼巡撫廣東如舊。此則督臣建置之始末也。其開府梧州。亦自韓雍始。以梧爲兩省之交故。而梧居山嵐中。有瘴癘。邇年則間駐肇。肇東地也。去梧近於西。不失爲兼制。而於東更便於聯絡。以故督臣蒞任。必於蒼梧。而後乃間移之肇。以避炎爲名耳。非曰廣西有巡撫。而總督移肇慶。遂以督臣與西粵不相涉者也。此則梧肇遷駐之始末也。至於職掌。各有司存載在勅書。自不相淆。臣查得先以總督兼兩省巡撫欽奉勅諭。略曰。人民饑荒。設法賑濟。糧儲欠缺。多方措足。軍民詞訟。量情發落。其後總督而不兼兩省巡撫也。如操練兵馬。撫安軍民。修理城池。防禦賊寇。戰守調遣。便宜區畫。如廣西狼兵。加意撫綏。如兩廣饑荒。設法賑濟。各處逃移。遣令復業。如廣西運鹽。悉心計處。具載勅諭。惟軍民詞訟。則裁之。其職掌昭然矣。歷年以來。彼此遵守。循而安焉。司順士逆。則督臣與聞。糧餉出納。則督臣與聞。鹽法通塞。則督臣與聞。官員賢否。則督臣與聞。兵馬戍守。則督臣與聞。州縣建置。則督臣與聞。其他如官員給由會疏。附近府分則與。而餘則不與。大計糾劾。則不與。詞訟關係士司。例當通詳。而一切常情。則不與。里甲派徵。吏役起送。則不與。雨澤奏報。屯糧查參衛所承襲。則不

與諸如此類難以枚舉然則督臣亦何嘗侵撫按職掌乎而今者巡按廣西監察御史錢一本之奏也實起於奎光一塔夫一塔之建起于一時一念何關職掌該前督臣駐劄蒼梧偶以兩學生員之呈遂行道府議建事干創置且動官銀安有不通詳之理其失于通詳吏書過也上之則該府過也又上之則該道過也督臣豈得批之使詳亦豈得尼之使不詳乎而乃不勝其怒遷而道府又遷而督臣以爲督臣謂梧爲己所私轄致道府各官不復知有廣西撫按不太激乎然此猶有因也臣無與也至謂廣西士紳言曰廣東止是半箇巡撫廣西乃有一箇半巡撫民似不堪果如所云則是督臣之爲西人蠹也焉用此贅疣以蠹西人爲哉臣竊思之人臣銜天子命有事一方果其仁明互用張弛合宜吏弊掃矣而告訐之風不長武威揚矣而雞犬之驚無聞法求利民毋輕更張事務得體毋責細小毋逞胸臆毋大聲色則官雖多亦民之利也而不然者雖少亦民之擾也夫獨粵乎哉除薊遼宣大專設督臣者無論已且以撫按言之湖北川東不屬貴州乎南陽漢中不屬鄖乎是皆一箇半巡撫也而不言擾荆襄不屬鄖乎南贛不屬贛乎是且兩箇巡撫也而不言擾粵之南韶惠潮不屬南贛乎是又一箇半巡撫也而不言擾又如湖之衡永近屬粵西巡按兼轄矣是亦一箇半巡按也而不言擾乃督臣事務與前之兼攝者且自不侔而遽曰一箇半巡撫也曰民不堪也其然乎哉夫督臣未嘗越蒼梧一步歷粵西地也又未嘗有一供應費民財一詞訟破民產也卽文移通詳一紙之費耳卽三院會疏一稿之費耳何所損于撫按而以爲侵又何所與于地方而以爲不堪以爲贅乎此臣所不敢知也用是以申明職掌請憲蒙勅下部院會議明悉孰

當與聞。孰不當與聞。行臣等遵照行事。則在督臣可免於侵越之譏。而在粵西亦可免於贅疣之視行而久之無事。耦俱無猜。有事同舟共濟。豈惟臣之幸。地方幸矣。臣聞侵官罪也。失官亦罪也。臣故不勝惓惓也。其二議經費。照得廉靜寡欲。當官首務。卽一命而上。惟是兢兢。况督臣乎。乃兩廣總督衙門。不知緣何從來有不韙之名。而業其官者。往往負不韙之議。臣自受代以來。求所爲招疑者。而不可得。旣而有言者曰。粵中除養兵外。所解軍門。每歲不下二十萬。近又有條議者曰。梧州盤鹽廠。每年約一萬兩。私解兩廣軍門。爲犒賞交際之用。乃知此二者爲招疑之因。而臣又碌碌甚也。倘不一一陳其始末。請議定制。將使當事者。視爲畏途。旁觀者。視爲利藪。而持議者。且視爲射的。不亦輕朝廷、辱當世之士哉。臣竊媿焉。臣非自爲計也。爲衙門計也。查得兩廣兵餉。取諸民者十三。稅諸商者十七。所謂二十萬之數。或亦近之。而自來解納。業有成規。如南雄府太平橋稅。每年以一萬兩解布政司充餉。餘則徑解梧州。如廣州奪船稅。每年二萬兩解司充餉。餘則存留該府。備支兵食。如韶州府河西遇仙治光等稅。歲約一萬兩有奇。俱解司充餉。與存留該府備支兵食。其餘如潮州肇慶鹽法。一切征稅。非徑解藩司。則存留本處充餉。絕未有分毫解軍門者。粵之官人人見之。臣不敢贅。惟是梧廠備用一節。有不得不直陳於皇上。查得梧鎮之餉。其出自廣東者有三。曰南雄橋稅。曰精兵銀兩。曰廣備倉米折銀。先年督臣議貯肇慶。聽梧州道府請發。而請發之餘。卽以充隨鎮員役廩行二糧。及功賞盤纏修理一切之費。當時紛紛之詬。由此而迄今所謂二十萬解軍門之說。或以由此逮萬歷十年。督臣劉堯誨查明歷年積剩。奏報貯庫。而一切梧餉。仍解梧州。

旣而督臣陳瑞又復改解肇慶。因復滋議。御史馬呈圖旋具疏請該戶部行督臣郭應聘咨覆。南雄橋稅精兵廣備等銀。仍徑解梧州如舊。其梧州廠所收鹽利竹木雜稅正餉。通報撫按。盡貯該府。分毫不得那移花銷。惟船頭備用歲抽不多。仍聽總督衙門備支功賞、差役盤纏、修理船隻一切公用。不得復動正餉。至今因之。大約每年船頭備用等銀多則約五千餘兩。少則三四千兩。不至如按臣所云每年一萬之多。而前三年內存梧州者今尙五千餘兩。亦未有盡解軍門之例。此則梧廠備用之始末也。蓋上而報功解功官軍。則有銀牌花紅額賞。而賞取諸此。次而報事報警。則有賞。而賞取諸此。又次而獻一技陳一策。投用報效者。驗而不得收。則有量賞。以勸其來。而賞取諸此。又次而差役之盤費。取諸此。又次而船隻衙門之修理。取諸此。又次而各處公差之量賞。取諸此。又次而鎮下員役衙門吏書之例。賞取諸此。惟隨鎮官軍行月二糧。戌梧官軍年終犒勞。駐梧則取之梧餉。駐肇則取之肇餉。而賞功所不與焉。其他項款。不能一一數矣。夫使一舉而裁之。豈不大快。而勢有不能何者。軍門事體。與他所異。羊斟之變。起於嘗羹。楚軍之奮。始於投醪。如報功解功。不則宜令之觖望。以失其心。如投用報事。則不宜塵之門牆。以阻其來。至於一遇軍興。尙有不可預擬者。而按臣曰。有功可賞。何不行道府州縣查而賞之。假如駐肇慶。亦可移文梧州而待其至乎。且安得一一行道府乎。則於勢又有所不能。臣度按臣之心。必以爲督臣者兼東之巡撫者也。粵以西如此。粵以東可知。而不知粵東之未有解所也。何者。軍門者蒼梧軍門也。東省橋稅精兵廣備等銀。歲輸之西者。不下七萬餘兩。以故西廠有備用。而東無與焉。蓋梧肇當兩省之中。鹽先由肇然後。

入梧乃稅之梧獨不稅之肇意可知也不然豈其以兩省之犒賞而專取費於西廠乎哉按臣見梧未見肇見西粵未見東粵其驚心駭目而形之論奏不亦宜乎臣竊以爲兩廣督臣之議大都起于軍餉而餉于督臣無與惟功賞一節欲絕之既勢所不能欲仍之則心又不白故敢以定經費請儻蒙勅下該部參酌別鎮事規臣衙門每年功賞等費定擬若干應否仍於梧廠船頭備用內支取而或時有常變用有盈縮卽聽其裒多益寡以羨補不足議之以實行之亦以實再不得分毫那用正餉違者卽行議處此外如船頭備用有餘則盡數查出以充餉聽支各衙門竝不得私動分毫如此則督臣之心事可自而旁觀者之猜嫌庶其可消於西之兵餉亦可小補乎臣惟士人行己所貴信心不在潔名臣之曉曉涉於爲名而又不盡議罷也且涉於爲利然臣不敢也臣觀今論者祗知十年以前之兩粵而不知十年以來之兩粵視兩粵督臣若賈人入市然甚且以爲總督與諸司不同而兩廣與中土不同也臣竊羞之人臣者果念念在利私開徑竇豈必兩粵又豈必督臣卽一命而上安所不可竇也抑能矢心守己豈獨下吏卽督臣亦安所可竇也是在人耳且朝廷有四目在焉有三尺繩焉安所逃之而至於兵餉且重大焉臣安敢以其身爲溝壑而不一一直陳之乎又安敢沽一切罷絕之名而言之不可行行之不可久乎其以爲應議也惟今日其以爲應併而裁也亦惟今日臣議及此萬非得已伏乞皇上鑒臣之愚俯賜查議施行以便供職臣不任願望不任惶悚

冊務方殷管理宜專疏

題爲冊務方殷管理宜專懇乞聖明定議就近兼督以便責成以重版籍事據廣東布政使司呈詳奉臣批據本公司呈准分守嶺東道左參議羅萬程咨稱督理黃冊原係前任參政蔡國炳奉勅坐名專理今既離任相應委官帶管緣本道駐劄長樂距省八百餘里文移催促往返惟艱獨糧儲道居省會適中之地十府道里惟均堪以管理該本公司看得糧道未到議將前項冊務仍行嶺東道帶管候糧儲道左參議馬千乘到任之日方送接管緣由奉批督冊道務准行分守嶺東道羅參議帶攝冊務舊何以專屬之嶺東道該道旣稱往返甚艱應否酌議候糧道接管是否長便應否題請仰司查明速詳依奉行准嶺東道回稱歷稽嘉靖隆慶暨萬曆七年以前俱係糧儲道督理至萬曆八年十月奉旨裁革糧道衙門九年卽攢造又值本公司缺官遂以冊務坐委嶺東維時嶺東衙門設居惠州距省稍邇猶得以倏往倏來文移往返亦不甚艱迨萬曆十四年題准將本道兼伸威兵備駐劄長樂地方僻處東隅卽計程赴省已約一十餘日矧自是而南韶自是而海北又自是而海南然平居無事猶可言也目今倭報叵測兵食籌度水陸隄防雖專力圖維尙恐不足安能分精神於他務又使糧道未復猶可言也目今糧道已於萬曆十二年七月內題准復設事務簡易且管轄通省又住會城文移便於傳遞視之外道迥乎不同前項冊務亟宜改委等因到司該本公司看得十年一造黃冊實關重務查隆慶六年分係糧儲道萬曆九年分係嶺東道各奉勅書督造今屆復奉勅坐名該道左參政蔡國炳督理今本官去任該左參議羅萬程陞補查得勅書原有坐名不係接管緣以駐劄遠文移不便欲將冊務候糧儲道馬叅議至日交理隨查糧儲道衙門

委住省會於各所屬道里文移相宜且無地方之責屬之督理似爲長便但今尙未到任難卽責成況前事原屬部議必經題請另行頒發勅書方便遵守等因到臣隨查先據該司呈詳已經批行查議去後今據前因適巡按廣東監察御史王慎德養病回籍該臣議照民數之重自古而然十年大造以稽登耗平賦役獻之天府副在有司誠重務也而粵以東道里遼闊山海糾紛軍民錯壤而居夸漢竝畝而耨淆之則易清之爲難非得其人而專理之必且以草草了事得人矣而道里不便又且以遲遲愆期以故先年督造大都屬之糧道而糧道旣革則移之嶺東守道當其時嶺東有分守有仲威兩道並存於事爲簡仲威駐長樂分守駐惠州間多移住省城於勢爲便乃萬歷十四年以前督臣之議罷仲威道而專以守道兼兵備駐長樂矣其事務較前則煩其道里較前則遠而各郡有司又且目攝而心易之以爲非所轄也雖嚴行督責難以泄濶應之間有批查駁勘往來動經半載而今者值烏夸傳報之日尤嶺東戒嚴之辰外之則慮海氛之潛入內之則備山巢之竊起責任之重大非他時可比顧此失彼勢所不免該道之呈委非得已且糧道業已復設而賦役乃其專司住在省城道里適均則催督便通省有司皆糧道轄也視外道不同則責成便冊籍在糧道賦役在糧道則叅對便較之以嶺東帶管相去遠矣該司之議委爲可從况蔡國炳領有專勅而國炳已去羅萬程接管道務而勅尙未更當此交承之際正可更議之會相應題請伏乞勅下戶部覆加查議如果臣言可采合無准將前項冊務專責糧儲道新任叅議馬千乘到任之日遵照督理員下坐名勅書併乞頒給本官祇領欽遵施行其蔡國炳原領專勅另行奏繳自後永屬

糧道以爲成規庶責成旣便而冊務有賴矣。

將官約束不嚴有司舉動未當疏

題爲將官約束不嚴有司舉動未當乞賜酌議以杜幾微以正紀法事據廣東按察司整飭嶺西兵巡道副使洪有復呈解犯人黃勝等招由內開問得一名黃勝云云蒙道覆審得黃勝、羅子明等徒以欲護黨類頑然罔知法紀輒乘回操倡衆突縣至於壞門推座殘傷物命此驕悍之漸胡可長也擬配猶有餘辜黃勝、羅子明爲首宜引刁軍民結黨之例戍遣陳元、陳會爲從姑照原擬婁奇管解致金貴脫逃罪何容諉但審無賊以不覺失因論似亦非縱關清等雖非專責然皆批差及全領解之人擬杖亦宜再照恩陽守備魯儒招稱全把總等官奔至論散各兵則未必有乘機主使之情傳箭奪文竝屬無據第部伍乃其素轄籍令鈐束之嚴曷以至是雖事起倉卒而責自難辭陽江知縣湯瑞案以人命爲重情箠楚所加雖失之遽而未爲過舉驗審初獄爰書未就則亦非有偏枉之跡惟其驟然以不軌加人則未免言之過而少安詳之見但該縣履任方新他失無聞而守備魯儒當日解散各兵嗣亦細責首惡當地方用人之際合無量行戒諭以責後效蒙將勝等取問罪犯議得黃勝、羅子明、陳元、陳會俱合依弃毀器物者計職准竊盜論免刺官物加二等一百二十貫罪止律黃勝、羅子明爲首各杖一百流三千里陳元、陳會爲從減等杖一百徒三年婁奇依押解罪囚不覺失者減罪犯二等律杖九十徒二年半關清李行虞三各依不應得爲而爲之事理重者律杖八十俱有大誥及遇蒙恩例通減二等黃勝、羅子明各杖九

十徒二年半陳元、陳會各杖八十徒二年婁奇杖七十徒一年半關清、李行、虞三各杖六十俱民黃勝、羅子明各照例免杖徒及照恤刑各免枷號拘僉妻解發詳定附近衛分充軍終身抄招報布政司轉達兵部知會陳元、陳會婁奇、關清、李行、虞三審俱無力依律的決追紙完日陳元等三名定發衝要驛遞照徒年限擺站滿放關清等革役發落寧家照出充軍黃勝、羅子明免紙陳元等各納民紙銀一錢仍於黃勝等共追陪縣門一扇價銀六錢公案一座價銀五錢給匠辦料修整鹿一隻價銀一兩入官作正支銷未獲金貴嚴緝正法人命事情聽該府檢明另結具招併將黃勝等解審到臣案查先據陽江縣申爲強兵擁衆搶奪人犯衝入縣堂打毀事又據陽江守禦千戶所申爲兵變事并據該縣揭帖爲悍將縱兵毆打良民集兵搶劫脅逼邏截事又據恩陽守備魯儒呈爲操練軍馬事俱經批仰嶺西兵巡道查究去後今據前因該臣覆審大約與招同而將官有司之過有不可諉者夫兵之不得不設也設而不易戢也所從來久矣爲將官者時時防檢猶懼其逸而況可泄泄以坐視其釁爲有司者事事調停猶懼其乖而況可忿忿以自離其心乃思陽之兵非有大衆也又皆地方召集之貧民非四方烏合比也其初又非有大故也守備魯儒以防汛重務票差營兵喚取鐵匠打造軍器豈非公務哉又豈非爲地方保障計有司所當協力而圖者哉奈之何鄉民李茂卿等事不干己輒曰守備不當喚民匠而與之爭爭而復與之毆毆而復縛之稱要送縣當其時兵惟金勝一人耳此其曲固已在民矣既而兵陳懋以遞文而至附近兵黃金等以聞而至分曹角立互相叢敵而民李茂卿以人命告兵曾太以傷肢體告使爲縣官者示之以大公

無我之意而處之以從容不迫之法審而後刑刑而不槩刑兵卽憚其何辭之與有而知縣湯瑞案之相屍也陳懋等則先責之併作報傷支吾則又責之至於曾太等不肯一驗而曾太告驗之審兵則又責之及帶回縣而陳懋等又責之其被責者皆兵也其告驗而不爲驗者又兵也雖事方審理未見偏枉然毋乃有其跡乎而兵之心不勝其憤矣使爲守備者察其情形密而諭之徐而解之兵卽憚其敢違將官乎而守備魯儒且若罔聞知而兵之心又無所戢矣無幾何而開操操畢而散路經縣門管兵黃勝羅子明金貴者遂倡首糾衆逼官改審而湯瑞案業已退堂黃勝等遂喊攘突入撞開縣門推壞公案致傷鹿隻當有主簿田應春諭之利害各兵方始出門而魯儒聞其變也忙同把總陳著奔至縣前趕回原營此則其先事之大槩也於是湯瑞案以兵變具申而魯儒亦具申儒之申也則謂縣官爲偏護而瑞案之揭也且謂儒爲故縱甚之則儒謂瑞案非刑拷打草菅兵命而瑞案且謂儒爲潛謀不軌傳箭裁文維時各兵業已回營不復敢有恣肆而人命事情臣行嶺西道轉行肇慶府提至府城公審以兩服其心而魯儒旋亦細解黃勝等赴道轉解臣軍門究審至於非刑拷打傳箭截文等語反覆查審全無影響信口反唇有似市民刁告之狀儒不足責也瑞案文墨吏亦爲之此則其終事之大槩也該臣看得營兵雖已喧攘旋卽解散且罪犯未甚一有司者治之宜不足煩天聽顧天下事其始也常微而其終也常巨況東粵之兵敢行稱亂非一次矣其大都起於文武不相調而兵民不相下譬之星星不滅以至於燎原而不可救比而是卽今營兵入縣堂者二三十人耳其罪止於擁進縣門推壞公案耳臣旣以軍法於轅門外細打

示戒且在生死之間而遣戍者戍發配者配罪如是止而法亦如是止兵之心如是而亦微矣除批行外惟知縣湯瑞窩守備魯儒皆職官也而一則約束不嚴一則舉動未當以至於此其罪等耳臣故欲於其微而懲之以示文武炯戒焉法當參究適舊按臣王慎德養病回籍新按臣饒位尙未入境臣恭照得恩陽守備魯儒勇猛有餘識量不足職在治賦而不約束之於其先兵且亂行而反欲文飾之於其後虎旣出柙咎將誰諉陽江縣知縣湯瑞窩習氣未融褊心已甚人命豈其不重而扶傷告驗獨麾而不理能無偏護之嫌守備豈謂無尤而極力抵誹且坐以不道殊乖士人之度召侮有自弭變無方卽竝處之宜不爲過但湯瑞窩任方始他失未聞雖欠周慎之防尙無偏枉之實儻據此議處則恐其長跋扈之氣而將來者難乎其爲令也臣切慮之魯儒當卽諭散旋能擒解似茲桑榆之收庶贖東隅之失儻覆行重處則恐其滋偏重之勢而將來者難乎其爲備也臣又慮之此二臣者相應姑各降俸管事以示懲創以責後效者也伏乞勅下該部查果臣言不謬覆議上請將守備魯儒知縣湯瑞窩姑各降俸一級仍容省愆視事庶處置公平而軍民允服旁觀而逖聽者亦將知所儆惕矣惟復別蒙聖裁止議罰治臣不勝悚切待命之至

### 邊海帥臣事權未一疏

題爲邊海帥臣事權未一懇乞聖恩換給勅書以便責成事據廣東布政使司呈詳奉臣批據鎮守廣東地方總兵官童元鎮呈稱接到欽奉勅諭署都督僉事童元鎮今特命余充總兵官鎮守廣東地方駐劄

會城統領仲威營原遺官兵管理惠潮各府州縣募兵并全省軍務無事操練兵馬保固城池分防通海要路剿捕地方山賊如遇事情重大調集通省官軍相機防剿參將守備等官悉聽爾節制若有南韶各處流來山寇與南贛巡撫約會行事仍聽總督兩廣軍門節制調遣民間一切詞訟不得干預爾尤須持廉秉公竭忠盡職務俾地方平靖以副委任如或因循貪悞致悞事機必罪不宥尔其勉之慎之故諭欽此欽遵伏覩勅諭首開統領仲威營原遺官兵管理惠潮各府州縣募兵蓋嘉靖四十五年惠潮地方多事議以福建總兵兼管故也又開事情重大調集通省官軍相機防剿參將守備等官悉聽節制蓋當時止有東路西路瓊崖海防四參將惠潮一守備故也今查本職所屬見有副總兵遊擊都司把總未經載入是衙門專設雖新而勅諭兼管如舊及覩廣西總兵勅諭內開撫夸道官凡事俱聽爾會行不許掣肘都司守備衛所各官如有懈於防守悉聽爾查參究治哨堡募兵敢有抗拒軍令不服查點調遣及各部軍兵臨陣退縮者通賊姦細審究是實竝聽爾以軍法處治本職竊思東西兩廣事同一體較之責任廣東尤重而乃事權未正名分罔嚴方今倭報頻仍凡稍涉乎虛文將難責其實效况天語既出則人或諉于字樣之無預約東益難合無懇乞轉題比照廣西勅諭換給庶載掌明而遵守便號令新而鼓舞至矣具呈照詳奉批仰布政司會按察司查明報奉此隨該本司署印按察司鄭時章會同按察司署印副使游朴查得東粵地方先年山海寇盜竊發倭奴入犯惟潮州爲最故設仲威營總兵衙門駐鎮該府又有東路西路瓊崖海防四參將惠潮一守備各守一隅以多事之秋當先其急而扼其衝也嗣後寇盜蕩平

前任張總兵於隆慶五年八月內到任寄住省城。往來靡定。至萬曆三年內。遂議以嶺表東西相距數千里。山海均屬重防。添設潮漳副總兵專駐南澳。又設參將游擊守備把總部領各路官兵分布防守。而總兵衙門就於本年八月內詳允動支官銀于省城建立駐劄居中調度控制全省。今總兵官童元鎮領到勅諭。尙係始設伸威營總兵責任未載。有廣東都司潮漳副總兵并遊擊把總于內本鎮爲全粵主帥。三軍司命水陸責任關係不小。所當正其事權以便遵守。請欲比照廣西總兵勅諭換給似亦相應等因。到臣查得先據廣東總兵官童元鎮呈前因已經批仰布政司會同按察司查明報奪去後。今據前因該臣議照人臣提三尺劍專制閩外。而諸司莫敢後先。豈其力能制之。惟是仰藉朝廷之威靈。以震懾於臨時。而又藉朝廷之勅諭以宣布於平日。夫是故人無玩愒。而事有責成。東粵之有總兵也。初猶以福建總兵兼之。且劄程鄉。且劄潮州。至嘉靖末年。廣東始專設總兵。猶然偏駐惠潮。蓋其設也以惠潮其駐也亦惠潮。故其勅諭惓惓於伸威營兵。而他未載焉。當其時南澳之副總兵未設也。故其勅諭亦僅僅參守等官。而他不載焉。乃今總兵官議駐省城。而事體因革較曩大異矣。一有調遣。則副總兵及都司官皆屬其統轄。而勅不之載。人將曰。是與我不涉也。其胡以約之。全廣官兵皆屬其統理。而勅內獨指伸威營原遺官兵至事情重大。乃得調集通省人誰不曰。非重大不得轄我也。其胡以相率。臣詳觀其勅。大都仍因先年之舊。于其中特改駐劄省城四字而已。夫平居無相統之名。則臨戎無相制之威。無事既反脣而旁觀。有事且掉臂而遠去。勢所必至。無俟問者。方今警報時聞。振刷伊始。總兵官換給之請。與兩司正事權之議。

倘亦今日之不容已者乎。相應代題。伏乞勅下兵部。再加查酌。如果臣言可采。覆議上請。合無將總兵官原奉勅書所載。仲威營原遣官兵。及惠潮各府州縣募兵數言。准賜刪改。并將潮漳副總兵。及廣東遊擊都司官員添入節制之內。仍照廣西總兵官事體。於中酌量地方機宜。略加損益。另撰勅書。頒給本官欽遵行事。仍聽臣總督軍門節制施行。庶分閫帥臣。獲以展布而偏裨之受成者。知奉約束矣。惟復別蒙聖裁。

# 制府疏草卷下

留任方面能官以奠遐荒疏

題爲懇恩留任方面能官以奠遐荒事臣觀粵以東防在山海粵以西防在土夷其責任皆監司身之而土夷非內地比也其人則烏言卉服其地則叢岡複嶺兵至則鳥散無蹤兵退則蠭屯如故蓋兩江皆然而右江爲甚然又瘠鄉也有司者且人人銷沮跋踵釋負不復問猺獞何狀而况守巡其地者乎一有爭鬨不過檄行將吏以勘處塞責一有事變不過申呈三院以勦撫藉口而卒未有爲地方懷百年之慮圖萬姓之安者苟且因循所從來矣竊見分守右江道右參議龔一清心無矯飾事有擔當雖蠻烟瘴雨了無難色於窮荒深箐靡不周巡或裹餓糧以拊其部落或易衣冠以度其山巖自從來不見漢官威儀者莫不且望且嘆且警且喜以爲從天降耶而本官且呼而勞之出而撫之諸所爲隄備消弭計漸次而理之右江一帶稍無越志於是前撫臣蔡某有久任之議前督臣劉某有久任之薦前按臣錢某有久任之條陳爲地方計不得不爾而適見邸報龔一清以雲南副使推矣代一清者陝西參政顧其志也雲南有事之秋簡擇固當而顧其志又精明有爲頃者荆南之政臣彥習之其代辦宜無難然臣觀之今日而一清有不可不留者三焉往一清議以夸方之民不習法度而習逆遁繩之爲難剿之非策莫如量地設堡守以夸兵給以夸田則可以杜匪茹之萌則可以寢啓疆之思蓋荔波有甲站堡武綠有白山堡融有攬

日堡馬平有里團等堡象州有藤嶺等堡羅城有大蟲隘堡兵不煩調遣糧不煩區處日有繆矣顧夸民方在且疑且信之介而堡舍亦在可暫可久之間倘一旦而去之臣恐繼而來者雖甚賢智未必卽諳其地里雖能猝諳未必卽治於夸民或見有商參或身憚馳驅其不奔前功而孤後望者與有幾此不可不留一也懷遠建縣議非朝夕而地惡夸悍不可以居至今綰邑符者僦寓不常與無縣等耳一清單騎荒棲周爰相度鼓舞有司力肩其勞城壘修復不日可完至如天河之振舉又方新也東蘭之勘處又方始也此其利害去建堡不又大哉始事者一清而終事者非一清將夸民玩視之而有司懈應之矣可乎此不可不留二也顧其志方督糧西夏非代不得行其赴任之期未可知而長安去粵遠寧夏去長安遠其受事之期又未可知龔一清卽令候代乎官非其地責成不便縱本官不爲怠而旁視者其誰不曰五日京兆也前功不隳乎粵西監司能有幾人分守桂平分巡蒼梧以入賀行分巡桂平左右江陞而未到分守蒼梧近又報陞矣缺官已甚代匱爲難乃一清者其關係如此而又安得聽其去也此不可不留三也以右江之險惡人情豈不以去之爲快而臣爲地方計有不暇爲一清計者時廣西巡按御史尙未入境臣會同巡撫廣西地方都察院右僉都御史陳冒昧以聞伏乞皇上俯念遐方特勑吏部覆議上請將參議龔一清卽以新銜兼職分守廣西右江如舊以竟本官之施以慰地方之望其參政顧其志或卽以龔一清雲南之缺填補或另行推補遐方幸甚臣等幸甚臣不勝仰望悚切之至

題爲取用禦倭將官事。本年八月十四日准兵部咨職方清吏司案呈。照得倭報緊急。京營重地。如遇有警。必得熟諳倭情之將。方保萬全。查得原任狼山副總兵陳璘。熟練海務。向樹倭功。本年正月內。該本部題奉欽依。起補神機七營參將。而兩廣總督衙門。方在委用防汛。咨留惠潮。今照彼中汛期已畢。此之倭患方殷。相應速取來京。以備緩急。案呈到部。看得遼陽之倭報日傳。將官之得人甚急。委應速爲取用。合候命下。將陳璘添註神機七營參將。本部馬上差人守催本官星夜來京聽候調遣等因。題奉聖旨是欽此欽遵。備咨到臣。當就馬上差人催促本官。束裝兼程赴京到任。隨據本官呈稱。卑職自結髮從戎。前後經數百戰。未嘗不身先部曲。然摧鋒陷陣。非得服習之兵。利害俱與恩信相洽者。難奏成功。茲聞倭夸擁衆。突犯遼陽。叛卒搆虜竊據寧夏。勢甚猖獗。此正卑職捐軀報國之會。竊計抵京必有見兵付之統領。固無不可。第兵不識將意。將不知兵情。則兵家所忌。及查嘉隆年間。倭犯浙直閩廣。皆係南兵殺敗。自是南兵遂爲倭賊所畏。職自狼山罷歸。未敢頓忘圖報。固嘗養士。亦頗精強。但爲數不多。必須添募。乃可啓行。然所募之兵。弃父母。捐妻孥。不遠萬里。而赴鋒鏑。非有厚給。何以致其死力。而樂爲用。其安家路糧工食等銀。尤當優處。合無請乞軍門除職。見有家丁。隨帶充役。餘行東西二山并中路。將見在營兵。挑選精銳。部領起程。其領兵把總。亦聽卑職推選。平日曾經戰陣。同歷患難者。充之等因。到臣卷查。先據本官稟稱。募帶廣兵。該臣看得西變未平。東警又至。疆場多故。正臣子共念之辰。但可減此朝食。豈得自分彼此。據璘所稱。匪獨于璘爲便。揆之臣子一體急君之義。固當如此。相應查議。牌行嶺西兵巡道。移行參將陳璘。

不問在外在營或兩山或肇慶但有堪用選鋒之兵悉聽陳璘募帶以五百名爲率務在五日內募足起程至於安家銀兩行月二糧會議速報就於肇慶餉內借支俟行布政司取補去後隨據前因該臣詳批本官以兵將相習爲慮亦是長見卽照近行以五百名爲率許於東西兩山及肇慶標兵內聽璘自行選帶各將官不得阻而隊什長卽在五百人之內把總一員聽璘自用似亦計之得者兵貴精不貴多旣聽璘自選宜無不精苟精矣卽五百足也而長途約束更易矣每兵一名念其遠行准給安家銀五兩衣裝等項卽於此取之行月糧各以三箇月爲限念其長途之費每兵日共給銀五分哨隊長照本省定例行部限甚緊陳璘宜卽日就道毋少遲也仰嶺西兵巡道備移參將陳璘遵行仍備移羅定道轉行兩山參將知會外又據本官呈稱職見帶兵往北效用所有領兵把總爲一營之首必得兵機曉暢驍勇出羣及平素曾歷戰功同經患難若南鄉所百戶許應明者方堪茲選今查本官見在西山左營管兵請乞批行羅定道卽令本官前來帶兵速往等因又該臣詳批許應明旣與陳璘相習准其帶用本院卽委之押兵其該營把總另選以充可也仰羅定道照行去後除卽日填給勘合催令陳璘收拾軍器完備尅期就道由水陸路赴用外該臣議照將貴有能兵在素習有將無兵與無將同有兵不習與無兵同故廉頗老將思用趙人而平原約楚亦必二十人與俱蓋古豪傑猶然而他可知已陳璘之名於粵最著而其樹功於粵亦最多談粵之夙將無有兩者伏蒙皇上拔自廢棄之中授以京營之任責之禦倭必有可觀然璘所習者粵之兵也所習而用者粵之器也璘自聞命以來旣懷捐靡圖報之思又切兵將不習之慮議欲選

帶粵兵庶幾緩急相依似亦算之得者况疆場多故之秋正臣子分猷之日而臣仰荷上恩叨領節鉞每見西夏東遼之報恨不滅此而後朝食儻璘藉粵兵得效一割之用則臣亦藉璘少效一念之愚卽無璘之請猶將計之况其請如是而敢泄泄焉不先國家之急乎用是亟允所請而兵則取之東西二山與遊擊之標下約足五百軍器則取之璘所自製安家則人給五兩行月糧則人日給五分押兵把總則聽璘自選以百戶許應明任之哨隊家健與一切等費則聽該道詳議照本省例而加厚給之臨行而藤盜不足則又行中軍官選取二百八十頂足之璘行有日矣顧客兵入都城非經題請則不敢擅使客兵支錢糧非經題請則不敢開銷客兵經長途非經題請則又恐其驚人耳目不無阻滯臣敢先馳以聞伏乞勅下兵部覆議特賜愈允施行臣不勝懸切待命之至

### 島夸情形已真沿海防守宜密疏

題爲島夸情形已真沿海防守宜密敬陳末議以裨地方事臣惟廣東夙稱有事之地然慮在山澤者十八慮在海壘者十二蓋海波之靖亦既有年矣頃雖據有琉球高麗之報而持議者且然且否以爲是虛聲恐暎夸邦耳乃今突入高麗并其地而據之情形見矣彼其心不爲一高麗動易知也而閩廣吳越又島夸所嘗抗顏行之地彼其心未嘗不垂涎又易知也防守之備尙可如曩者姑爲之而姑俟之哉臣欽奉上命叨領節鉞一切事所可爲分所得爲不敢不竭駿力以圖報萬一而人情狃於故常議論岐於彼此司度支者或不暇念封疆掌民社者或不復問甲冑或業有成議而臣不敢更或事關銓選而臣不得

與是用罄其一得列爲五條敢徼惠於明命庶儆惕乎衆心伏乞勅下該部覆議行臣遵照施行臣不勝悚切待命之至

計開

一議選補以便責成照得兵將相習自古尙之而不相習也自古患之廣之補兵往皆主以將官而不肖之官或有因而滋弊者自前督臣懲客兵之悍而議選土人近督臣復以地方多盜皆貧民爲之於是議選貧民而一切責之有司每遇缺兵將官聞之道道行之有司選足送驗呈詳收用豈非爲地方長算而有司者錢穀訟獄日萃於庭勢不能身親其事往往委之佐貳巡驛等官或徑責里排舉報而報自里排徇私者十而十矣選自卑官徇情者十而五矣謂之貧民而不皆貧也謂之壯丁而不必壯也營充之弊又不在將官在此輩矣州縣官但得其人卽送該府海防官轉呈該道以了前件不復問強弱云何及送該道卽甚精覈亦安能人人而退之以取多事之嫌不過照依有司原選略退一二入以了前件而餘皆呈請收用矣臣軍門又安能遙知其人之強弱而進退之又不過照依道詳批允收用而將官者遂不得所從來矣卽有不堪隱忍而留之耳後來者卽欲去留一人亦投鼠忌器而止耳於是兵之心益輕將以爲若不能去留我其如我何而爲之將者且目矚心非以爲利害我之利害也獨奈何束縛我不令我去留一人也蓋讐之燕人造舟而越人駕之必無便矣卽人人精強而將官亦有所藉口矣無論往事卽如上年聞警以後行各州縣精召沿海居民以充潮州兵船之用而及其抵

潮十不中一大半見海濤而目眩頭暈者此非將官之言潮州道之言也則有司之不堪召兵亦其一驗也方今島夸叵測防守非往日比更絃易轍惟此一時臣以爲廣人之強而習於水不減四方其召補土人之策可仍也惟是召補責之將官令其自選先儘土人不足則及客人之居住者大約缺兵百名備召兵一百五十名審其氣力如何技藝如何選之既定然後以花名解送該道逐一試驗去取選足缺額呈臣衙門收補惟藝力兩優則取之而非其人也不得與焉夫驗之該道以革其虛冒營求之弊召自將官以杜其推託乖異之萌如是而復有虛冒營求者以法繩之耳且也卽召兵之堪否亦可以占將官之廉貪又一便計也較之將官用兵有司補兵彼此若秦越不相關而兵將若主客不相下寧直什伯哉夫此亦臣所可行業且行之而前督臣劉某題奉欽依故臣不敢不以更議請若衙門人役有缺選用貧民如前督臣議則永永行之可也伏候聖裁

一議抽練以備緩急照得民壯之設卽古寓兵於農之意較之召募調遣相什伯焉而行之最久寢失其初有司者若以謂供役使而設而營充民壯半係衙門積棍亦若以爲供役使而外無與吾事者一遇警急則不得不取辦召募一有召募則不得復問所從來而召募之兵聚之易養之難有事而召之易無事而馴之難夫國家取民之膏脂以養民兵乃僅充一役使之用而緩急無當也則安用此爲哉粵多盜之地也山陬之防往往不得輶而自島夸報警海上戒嚴粵益多事矣諸凡緊關處所亦旣稍有次第卽令議兵議餉又且絡繹相望而險要甚多防守難周臨時調發又或有出於居恆分布之外

將日議加募乎。則糧餉無從處辦。將坐以待變乎。則緩急又或束手。臣日夕念之。惟有操練民壯一策。而民壯有名無實。所從來久。雖嘗屢奉欽依。嚴行訓諫。亦皆槩而行之。有司者槩而應之。莫有能着實舉行者。臣切謂以操練責之州縣。雖三令五申。終成虛文。莫若立爲抽練之法。略如選鋒之制。而專其責於該道乎。州縣民兵。豈無壯夫。自守城庫獄外。豈無餘人。誠嚴革占役。於其中抽選精壯。每百人或抽二十或三十。擇其饒于力。精于藝者。州縣送道試驗。果其中選給。以年貌疤痕腰牌。籍名在簿。名曰抽練民兵冊。每當開操月分。令其前赴該道。將一府所抽之兵。編成隊伍。設法團練。委一賢能官司之團練之法。不必日日走陣。每當操三之期。走陣一日。餘則較筅較鉢較鎗較銃。較刀就各藝中。分其優劣。而賞罰焉。仍擇一教師教之。各隊兵藝日精。則賞及教師。仍候補哨官之缺。一營兵藝皆精。則賞及委官。仍紀錄優薦。而大歛操月分。仍令回各州縣。爲助守倉庫獄囚之用。有事聽調。其團操之月。每兵加給行糧。以示鼓舞。與夫下操犒賞。教師工食。委官月糧。俱得于兵餉內支給。不派之民。如是。則不加兵而兵足。不易兵而兵強。散之則隱然虎豹之威。用之則猛然熊羆之陣。其集也不數日而可到。其散也。但一檄而卽回。分之則寡。合之則衆。或亦山海兩防之一助乎。臣聞原任兵部尙書譚綸。備兵寧波日。以練民兵爲事。踰年零倭突入。而民兵卽殲之。夫人性豈甚相遠哉。臣故以爲抽練民兵便。臣亦嘗行之各道。見在查行。而非奉欽依。非嚴賞罰。恐又視爲文具。如往日焉。臣請今後殿最各道。卽以此爲準。而有司中。敢有占役如故。與泄泄不如令者。卽夙有虛名。容臣與按臣糾罷之。庶幾人心知儆。而前

議不爲虛矣伏候聖裁。

一、議臬臣以責成功。照得臨時易將。自古忌之。夫獨將乎哉。沿邊沿海之兵巡其重等耳。廣海國也。自島夸報警。在在皆防。而潮之南澳。廣之南頭虎頭門爲最。廣司道有司。人人皆與有防守之責。而潮之兵巡廣之巡海爲最。乃廣州巡海道鄭時章。惠潮兵巡道王一乾。皆能臣也。經理漸次就緒。而時章報陞。代時章者。且有人臣不敢請矣。臣獨計惠潮兵巡副使王一乾歷俸三年。給由在邇。以時章律之序遷。當亦不遠。而潮非他所比也。今之潮非他時比也。島夸儻入廣乎。必潮其首。潮而能殲之。則全廣安。是潮固廣之蔽也。一乾年力強壯。才識明敏。歷任既久。於潮之事。若燭照焉。儻又序遷如時章也。即有代者。能猝至乎。卽至矣。能猝諳乎。臣故欲及其未遷之先。而以久任請。且非獨臣意也。亦地方士庶意也。臣不敢爲一乾丐澤。但乞勅下吏部。查果臣言爲地方計。俟王一乾序當陞遷之期。議以加銜再任。則全廣之門戶。且賴之。寧獨潮矣。伏候聖裁。

一、議便宜以審事機。照得廣自聞警以來。其間應造之戰船。應募之兵夫。應取用之將官。應預繕之米穀。應督行之保甲。應申明之賞格。該前督臣會議奏請。稟然具矣。顧海上計議。一時難周。人情意見。一時難同。有先議增而後議罷者。則南澳城兵是已。有先議少而後議多者。則廣海哨船是已。如此之類。不能悉數。又如總兵官議設中權兵船常泊虎頭門。則險要之地區所當允也。又如總兵官近議加陸兵一營。則樞要之地所當周也。又如南頭近議陸兵五百。與碣石限門等處近議兵船。各船又近議兵。

則門戶堂奧之間所當防也。蓋源源而來，在在而是矣。向者雖有警報，諸臣又在疑信之間，而今則情形既真，利害叵測，儻匪茹之衆，揚帆而南，不瞬息可到，其爲時甚急，而其爲慮宜甚周，固非可以泄泄聚談之日。若一一題請後行，將有緩不及事者。又如聽用將官，原題五員，內陳璘已起補京營，吳廣已調補柘林，武應隆充臣中軍所見在聽用，祖萬松慕學二員耳。臣查得原任雷廉參將江應龍生長海濱，熟諳機宜，原任坐營都司今退職永安所千戶康九皋，先任海總，夙稱驍勇，其告投報效，則又有原任湖廣都司張用賢，曾把圖山，狎習風濤，據總兵官呈取，則又有原任福建都司鄧鍾，向出愈大猷門下，兼通詩書，尤攻籌略，此數人者似可備轄門籌贊之選者也。內江應龍以薊鎮論革，而雷廉有聲，臣稔知之。張用賢以圖山論革，而湖廣無過，臣在鄖時，又稔聞之。鄧鍾臣不知其事由云何，而觀其議論，委有可采。康九皋據稱止以借襲退職，而觀其氣魄，不難一割。當此用人之際，或亦可使過乎。其他添餉補兵事宜，尙有見在查報而未及詳者，請乞勅下兵部覆議，應增補之兵容臣便宜增補，應取用之將容臣便宜取用，一面咨報，其已經題允而今昔異宜者，容臣徑自酌改，其未經議報而陸續詳請者，容臣徑自准行，庶幾卒來卒應，而事可無後悔矣。臣不敢不先以聞，伏候聖裁。

一、議積餉以圖實效。照得兵餉之貯，本爲餉兵而設，使餉必用於兵，而兵皆強，則雖費猶省，使餉不用於兵，而兵漸耗，則雖省亦費。故覈餉者，但當覈其餉之虛實，不當計其數之多寡，否則浮慕節省，而軍實日耗，保障日弛，久之而積弱不可支也。卽有所節，其補幾何？廣之餉有額矣，前此者不無費用之過。

致遭瓜李之嫌。而自督臣劉某始報有積剩數目。後來沿之不改。於是粵之餉較清楚矣。而報有定額。人趨美名。有定額。則惟恐其額之不足。而或以遭嫌也。趨美名。則又恐其積之不多。而無以勝前人也。於是人務相勝。而兵不加少。餉不加多。又無有可勝者。於是多爲之方。以愚兵之耳目。而制其口吻。則爲之議曰。每缺兵百名。方請補。卽九十九人。不補也。及兵稱不足。而又爲之議曰。缺兵五十名。方請補。卽四十九人。不補也。嗣後不得已。而改爲三十名許補之議矣。是故粵之兵之所以有名無實。而日就損也。方今島夸戒嚴。急在然眉。若復泥故守常。以避一己之嫌。萬一緩急無備。如地方何。臣以爲腹裏限數。猶可也。第不當一切限五十三十。如故耳。若沿海戌守。關係緊要。卽朝缺夕補。猶虞不濟於用。而况可泄泄焉。便身圖而誤軍機乎。切謂人臣之義。以不欺爲主本。以相時爲要機。諸臣當事寧之日。爲國家惜財。彼一時也。臣愚當警報之秋。爲國家固守。此又一時也。臣不敢不預鳴於君父之前。請乞勅下戶部覆議。容臣從實酌處。財可節則節。兵宜補卽補。一隨地方緩急行之。俟將來者果積餘如曩日耶。餉自有餘。臣不敢冒爲功。抑不如曩日耶。兵自宜足。臣不敢任其咎。惟皇上鑒察之。伏候聖裁。

懇恩留任邊海極要將官疏

題爲懇恩留任邊海極要將官。以備防禦事。臣接見邸報。該兵部一本。爲缺官事。內五軍五營缺佐翼正。推廣東海防遊擊彭信古。伏蒙欽賜點用。臣惟島夸匪茹。逼近遼左。此疆場多故之秋。正主憂臣辱之會。粵東雖要。不要於遼左。海防雖急。不急於目前。該部選擇而推。爲計甚當。臣卽有胸無心。亦寧不知時之

緩急勢之輕重若霄壤然哉然臣之愚慮有不得不冒陳於君父之前者臣竊料島夸跣足蓬首生長炎方性不耐寒遼左之地疑非所習卽天津山海其寒猶遼左也雖欲逆我顏行亦且不能在夏秋或不可知若冬春有凍而僵耳勢不得逞於東北必且逞於東南一逞於東南則吳越閩廣皆其地也島夸所嘗垂涎而飽腹者也尙可一日安枕乎此其不可無防明矣粵東沿海在在皆要而莫有要於南頭者南頭當大海之口爲入廣門戶夸儻自潮而來則南頭首當其鋒南頭而能堵之則省城安南頭而不能堵之則省城危而南頭又當商舟出入之口譏察而疎則見爲易與而姦人之通夸者接踵譏察而密則見爲多事而姦人之肆謗者盈城以故人無有肩其事者而彭信古獨力任之軍火器械置造方新艦艦譏察議擬方妥蓋南頭之爲廣重猶南澳之爲潮重也此其不可無能將又明矣粵中雖不乏將率多伯仲等輩而獨彭修古陳璘爲稱首璘以補京營行矣所恃者一信古而在粵則如信古者指不再屈臣故敢爲粵請伏乞皇上俯念粵東雖遠於時可虞南頭雖僻於粵最要勅下兵部俯照今推加銜留任南頭以究信古之施以備防禦之用地方幸甚臣愚幸甚

遼明旨舉將材以備任使疏

題爲遼明旨舉將材以備任使以重邊防事准兵部咨該本部題奉欽依通行各該撫按官不拘本處別處見任廢閑爲事充戍將領果能熟諳禦倭邊海戎務者從公咨訪真確各據實事會薦行來以憑酌量

推用等因移咨到臣已經通行各司道并總兵官遵照咨訪去後臣惟天下無必勝之兵有必勝之將夫將之爲人國重也人人言之顧南北異勢倭敵異形禦敵禦倭異用自嘉隆以來海波不揚文武吏習於恬嬉者三十餘年一切禦倭置之不講亦三十餘年當時二三宿將大半老死牖下卽今所稱材官要皆口談耳聞未有身親經歷者蓋聽其言則人人皆韓白而覈其實則千萬人而不一韓白也亦安能預知其效而信之然而高麗告殘矣遼左震驚矣卽山海天津吳越閩廣處處周防矣惟國家多故之秋正臣子致身之日敢不悉心訪求以備任使萬一時巡按廣東監察御史尙未入境該臣察之衆論參以實蹟除總兵官童元鎮朱先見任大將無俟臣贅原任參將江應龍見任廣東都司僉書許國威業有別疏臣不敢贅外臣查得原任總兵郭成其事於廣也廣之人迄今道其勇而臣聞之其事於貴也貴之人迄今思其能而臣又聞之雖行誼曾滋多口而材勇可當一面且惠州禦倭之勞至今猶在人口此一臣者其年幾何臣不及知其廢閑與否臣亦不及知而以臣所聞禦倭宿將成其一焉成儻見在乎可備大將之選者也又查得見補神機七營參將陳璘身經百戰氣雄千夫雖投閑而不忘裹革之思甫起廢而益奮弃繙之志見任廣東廣州海防遊擊彭信古志氣超羣勇略邁衆捐貲以收壯丁絕無身家之念畢智而造利器大裨水陸之防此二臣者可備大將之選者也又查得原任廣東潮州參將葉勸出身行伍究心韜鈴其初任東浙則臣習聞其勇其歷任東廣則臣猶聞其槩卽前督臣方疑其託疾而糾之又以其獲功而薦之旣與同官不協以致被論投閑人可知已見任柘林寨守備吳廣夙負驍雄曾經戰鬪起家行

伍而艱險備歷。旣經廢棄。而奮勵益新。潮陽水防倚賴爲多。雖用智不如用力。顧使勇何妨。使氣求戰將於今日。則廣有不可少者。原任廣東練兵遊擊王有麟。任把總於松海。曾樹奇勳。練標兵於端州。尤嚴紀律。第倔強易於招尤。而勇敢堪以任事。雖掛淮揚之議。不妨桑榆之收。此三臣者。可備參遊偏裨之用。而再試其成。以儲將選者也。以上諸臣。皆試於粵。而後先有聲者。臣故敢舉之。他如原任貴州清浪副總兵張奇峰。貴之功甚著。其談海亦甚辨。而臣悉其在貴。不悉其在海。見任鎮筸參將楊威。臣知其藝勇。而歷官雲貴。其堪任沿海與否。臣未之知。原任大同參將駱尙志。力舉千斤。勇當一面。而曾經倭奪與否。臣亦未之知。原任總督漕運軍門坐營俞尙志。追倭定海署參東甌人。以爲能。臣聞其略。而未知其深。原任蘇松遊擊范朝恩。夙狎波濤似長機變。臣亦聞其略。而未知其深。原任溫處參將吳海。古短于修行。長于治戎。則今布政使費堯年。亟稱之。福建鎮海衛千戶毛有澤。熟知海務。卓有雄心。惟小理之過。當懲。據平生之長足錄。則今布政使費堯年。按察使鄒墀。皆稱之。臣亦聞其略。而未知其深。然不敢不附聞。以俟再訪。當此緊急用人之際。但有所聞。據實以報。臣之職也。亦臣以人事君之心也。至於見可而用。則該部有衡鑑在焉。故併及之。伏乞勅下兵部。覆覈施行。臣不勝懇切待命之至。

夸心難測借兵宜慎疏

題爲夸心難測。借兵宜慎。懇乞聖明覆行酌議。以銷隱憂。以圖萬全。事臣待罪海邦。本年十一月初二日。接閱邸報。該兵部一本奏稱。逼羅夸使。自願出兵。勦倭緣由。奉聖旨。據夸使所稱。具見忠義。然事關重大。

還行與兩廣總督着移文另選一能事官員與原差官并夸使同往彼國宣諭朝廷德意取有回文方可頒勅舉事餘應行者俱依擬欽此欽遵已經通行司道將領等官一面選委聽候外臣惟時事多故島夸告急此皇上宵旰之辰正臣子捐糜之日乃暹羅夸使以助兵請於兵部兵部亟以聞而皇上允之蓋譬之醫然急則治標緩則治本今固其治標時也儻可藉此滅倭豈惟紓目前之患抑亦彰一統之盛夫復何言然而暹羅地圖粵人得之最真暹羅情形粵人知之最悉近自聞報以來粵中士庶皇皇偶語不勝杞憂而司道等官亦皆嘵嘵言之臣叨守封疆若復以言爲諱異日不幸如粵人所慮臣身不足恤如國事何用敢備陳其狀而皇上試矜而察焉查得暹羅居極西與滇南相對日本居極東與吳越相對約相去一萬一千餘里而界其中者有安南占城滿喇嘩呂宋琉球等國在焉暹羅之於日本惟是風牛馬不相及也暹羅雖世守臣貢乎嘉隆之間久以愆期至萬曆元年而始貢十九年而再貢彼其於中國又非素效忠誠如朝鮮比也乃欲悉其夸兵越人之國以犯兵法之所甚忌而爲我中國効力不亦難乎臣竊度夸使之告出夸使口耳其國王之心不可知卽夸使之告又或出各通事有志功名者意耳其夸使之心不可知萬一我不能必之夸使夸使不能必之國王將令而不從賞而不爲意不以道遠爲詞則以風惡爲解毋乃徒示中國弱生四夸心乎然此猶無害也周以狄伐鄭而狄卒病周唐以回紇制胡而回紇卒病唐若通金伐遼通元伐金宋之覆轍尤有不忍言者非我族類其心必異前門拒虎後門進狼自古而患之今天下固全盛時也以天下之力禦此島夸似無甚難而乃欲借兵暹羅臣聞暹羅之強不減日

本其狡又不減日本而技稍讓之以水戰則日本不敵暹羅之舟以陸戰則暹羅不敵日本之技藉令暹羅果提兵而往萬一不利必且請援於我將拒之耶彼固有辭抑援之耶則力又不給是未收日本之功而先搆暹羅之釁也是兩樹之敵也又藉今往而利也而果能紓我一時急也周臣有言報者倦矣施者未已彼又且挾己之功輕我之備以爲中國無如日本何其如暹羅何臣恐異日之憂不在日本而在暹羅也然此猶可圖也至於地方之憂如粵人所皇皇者臣又嘗籌之查得由暹羅至日本皆海也計必用舟師而其用舟師也先之廉雷瓊高繼之香山東莞廣州惠潮達於漳福台寧而後抵日本蓋中華靡麗之地無一不歷之而粵固首當其衝者也彼其奉檄而來舳艤蔽空勢必要我糧餉而數且無定責我賞勞而欲且無厭聞入我郊關其誰禁之蹂踐我百姓其誰敵之蓋狼土之兵所過爲墟况暹羅哉而况奉天朝之命以紓天朝之急又何憚不爲哉我問之則曰爲中國來也不問之又恐其有他變也且濱海姦人出入夸邦包藏禍心者實繁有徒一見夸兵之報彼且投入其中多方撥置而廣之香山又業有濠鏡澳在焉不知始是何年生此腐階迨至於今竊據海上不下萬衆幾於尾大不掉其所恃爲羈糜者特目前市舶利耳而犬羊之性終不可測其人則又皆暹羅佛朗機滿喇咖諸國之夷而中國亡命間亦有之譬之癟附於頸留之不可去之不能則此類是也暹羅渡海必將出於其途萬一戎心叵測而閩廣之人積姦巨猾若曩之曾一本林道乾者又潛爲之主彼且借一釁端突然而起如吐蕃刦盟故智以直入廣廣不可爲矣又不然而或存留多夸於中若曩之俺答所以禍西寧者然異日之害亦寧有已時哉而閩

越勿論矣。大都暹羅之兵背約而不出，則損我國體，而其爲害也小。如約而出，則無益於國事，而其爲害也大。臣又計之，暹羅卽誠心助兵，亦安能空國而行？多則三五千，少則二三千，聊以應我之命，而索我之賞耳。方今以全盛之天下，朝廷誠下尺一之詔，閩募若干，廣募若干，浙募若干，卽萬兵可以立致，而時當有事，人人思奮，卽統萬兵，寧患無人？又奚必借力於暹羅，而自見弱，且貽患也？況奪使久住京師，遼左告急之狀聞且見之，而我復借兵於彼，益示之弱耳。安知暹羅不有如關白者乎？又安知異日者不有所悔而動乎？雖萬萬無此，然不可不爲之慮也。而或者曰：以奪攻奪，古稱上策，何慮之與？有臣則謂以奪攻奪，惟平時行之可也。操縱在我也，事急借兵，而擬之以奪攻奪，不類矣。該部之見，豈其遂不及此？而華奪地隔，既限于不及知，忠愛心切，又迫于不暇悉，故止謂暹羅之助兵也。而不意其兵之必由海也，不意其由海而廣，而閩越也。不然，雖暹羅百請，而肯從之哉？臣非不知事在燃眉，計不旋踵，而揆之愚衷，參之聞見，以爲奪兵必無益，而用奪兵且有害。近之則害先於粵東，而究之則憂貽於國家。故敢昧死以陳伏乞，勅下兵部查果，臣言有據，覆議上請，亟寢前議，以圖萬全。其防剿倭奪，萬一兵力不足，或酌行各省定以名數，選一能將，募送闕下，惟皇上用之，何患乎？島奪何資乎？暹羅將海波可靖，而太平無疆矣。臣不任戰惕待命之至。

積勞觸熱，陡感危疾，懇乞放歸以全餘生疏

奏爲積勞觸熱，陡感危疾，懇乞天恩早賜放歸，以全餘生。以重汛務，事臣轍下不肖，抑荷任使，歷撫三藩。

旋總兩粵。曾未有尺寸可以報稱者。皇上復過而使之晉貳民部。臣受恩高厚。無以加矣。雖捐糜此身。何能報稱萬一。而臣力小任重。福過災生。入粵以來。大與風土不習。簿書之紛沓。內損其神。山嵐之瘴癘外傷其體。飲食漸減。痰涎旋壅。自秋徂冬。日不能支。然臣猶以國恩未報。不敢顧身。兼之京察在邇。嫌於託疾。又復勉強支持。力疾任事。而爲時愈久。受病愈深。逮至多盡。浸入四肢。瘓瘻不仁。跪拜無力。危急之狀。日日以甚。屢延醫生王經文等診治。而卒無分毫之效。咸云勞熱傷脾。其根已深。非謝事靜攝。必無痊可之期。即使謝事靜攝。而其瘻可且有不可知者。此兩粵士民所共見。臣非敢一毫詐託也。以庸劣如臣。分當待黜。何敢望趨新命。以危急如臣。豈獨不能趨新命。卽欲依期候代。而力亦有不支者。况今海上戒嚴。戎機旁午。豈其奄奄牀褥之軀。可以臥理。而新督臣陳藻。又方候代粵西。受事無期。臣儻不陳情。乞身萬一。山海交警。緩急無賴。臣一身不足惜。如國事何。用是敢哀鳴於君父之前。伏乞皇上察臣悃款之愚。矜臣沉痼之疾。特勑吏部准放歸田。至於總督事務。則粵西乃督臣兼轄之地。查之往牒。自粵西陞轉。亦有不候彼省撫臣之代者。容臣徑齋旗牌交新督臣經理。庶汛務不誤。愚分可安。臣幸而痊耶。猶得與田野氓歌詠太平。卽不幸而不痊耶。亦得遂首丘之願。死且不朽。臣愚幸甚。地方幸甚。

按邑志。公有司諫疏草三卷。視師疏草二卷。都諫疏草四卷。撫滇疏草三卷。今皆無所見。而唯此制府疏草二卷。邑志不載。乃歸然獨存。蓋世隔年遠。其家藏本無幾。適錢鄭二志前後迭修。悉送志館。不知爲誰。何攜去。送歸於無何有之鄉。而此二卷之存。正以未上志館故也。今按明史有云。自塞上

多警邊吏輒假招降幸賞公建言降人處內地非便又按公門人廬陵劉日升所作公行狀有云某侍郎過聽某比部郎冤殺四人而真盜就縛先生極論之此當即是育軒公賓退錄中所載周世臣荷花兒事

江陵裁冗官後唯

先生力陳山東河南糧道並裁非便計議最覈此當在司諫疏草中明史公閱視陝西四鎮邊務還

奏訓兵儲餉十事並允行當在視師疏草中明史初行丈量法延寧益田高文薦請三年征賦公言

二鎮多沙磧奈何定永額詔購金珠已停市而命以直輸內庫公言不當虛外府以實內藏尋言察

吏之道不當視催科爲殿最部議允行而張佳允以舊例請又疏爭劉日升行狀上詔司農取珍寶

折價皇女誕生詔取賞用秋祭山陵又詔取賞用先生三爭之承運庫銀作局御馬監中費並有所

請先生皆三爭之再上書言新建新會當從祀廟庭下禮臣議允之報可此當在都諫疏草中明史

定鄧子龍兵變撫納孟養車里修貢劉日升行狀疏救李中丞材詎誤當在撫滇疏草中又公撫滇

之先曾巡撫貴州明史都勻答千巖苗叛土官蒙詔不能制公檄副使楊寅秋破擒之宣慰安國亨

僞言獻木及徵木無有爲公所劾是公又當有撫黔疏草劉日升行狀公所刻有用夏錄籌海重編

今皆不存可惜也明史日本躡朝鮮暹羅貢使請勤王尙書石星因令發兵公請罷其議星執不從

而暹羅兵卒不出今唯此疏具在冊中洞悉島情曲中利害其他若定經費重汛務及海防事宜五

條皆經國之遠謨禦倭之要策又補史所不及者也余旣憫諸書之不傳而又深幸其尙有此冊故

互取明史及行狀所載詳識於此俾後之人知之書之傳也有自而其出也有時後之君子與我同

劉府疏草 卷下

志。爲補刊之可也。嘉慶六年三月二十七日後學趙紹祖識。



稿 疏 垣 三



許譽卿纂稿

本館據藝海珠塵  
本排印初編各叢  
書僅有此本

# 三垣疏稿卷一

明 許譽卿 略  
字公實，號霞城，江南華亭人。明萬曆癸丑進士，歷官都給事中，入本朝，避於僧，號寐庵，事見明史本傳。

## 吏垣十二疏

### 爵廕太輕等事疏

題爲爵廕太輕紀綱日替敬抒狂瞽之愚仰塵聖明之鑒事臣惟爵廕者磨勵天下之名器也而濫被之餘其流遂不可止紀綱者約束一世之大法也而凌夷之後其漸至不可長臣五年外吏荷蒙聖恩拔置首垣踵頂可捐莫能報稱竊見年來起廢途開冒濫資啓添註之額寢廣疏通之術愈窮業經臣同官孫紹統郝士膏先後具疏臣不須再瀆顧臣所久蓄於中而不能無說者則爵廕一途是已自兩朝登極凡我臣子恩廕頻仍纍纍若若不知凡幾比因皇子誕生普天同慶一時閣部而下以及三品京堂官復人人廕延子孫甚且有以講讀之勞而徵恩晉秩者幾年之間三沐覃恩臣子遭逢可爲極盛然分量亦可謂極盈矣乃日覩傳奉聖諭又以三鎮宣捷加恩文武諸臣夫武臣戮力封疆酬功自有成例至諸輔臣晉階錫廕臣竊惑焉不知當該鎮奏捷之年諸輔臣果盡在事爲禁中頗牧俎上折衝否乎倘旦夕黔蜀成功遼左恢復皇上於諸輔臣又將以何階何廕加之乎況當此仕途濫觴人情躍治之秋憂時者政思

有以隄防之辭榮表讓斷當自輔臣始臣知元輔平日克讓是其本懷此一舉也必借諸輔臣力辭而我皇上收回成命恐亦不待陳詞之畢矣至錦衣一官卽古之金吾查世襲非軍功不得濫予此祖制也遠不具論卽如尙書趙彥之血戰中原御史張銓之殉難絕域甫廕一子而今保母之屬閭尹之流紛紛傳奉至有爲兵部所不敢執爭者使海內聞之安謂陛下所以報勞臣任事之功恤忠臣烈士之節僅僅與婦寺承恩者等謂祖制何其何以鼓舞豪傑而抑止僥倖也哉臣故曰爵廕太輕也至紀綱之替則又有不勝痛哭流涕者矣慨自四十字山左妖氛閩海紅夷接踵見告此何啻漢臣賈誼所言首居下足居上者三輔之內同時而劫辱二令輦轂之下一日而盜殺六命種種駭聞況掠私財未已也寢假而截奪官餉乃半出脫逃之悍兵豈朝廷捐重寶以募之者不爲紫塞之貔貅適爲綠林之蠭賊乎侮縣令未已也寢假而迫脇柱吏且近屬管轄之門卒豈國家不惜厚糈以飽之者未爲抱關之壯士先爲脫巾之首亂乎網淪紀斂至於今日掃地已盡而臣所尤異者則在內監李實之泰楊姜也實雖奉敕督造不過一中貴耳欲使五品職官以屬禮周旋俛仰其間姜必不甘況姜果違悞上供錢糧堂堂撫按豈其庇一有司實獨不當知會聽其以白簡從事而乃矯焉思逞舉撫按參劾之權一旦自實侵之彼旣魚肉府官其何有於縣令彼且股掌撫按其何有於監司將來吳越間不眷眷多事哉且實疏入則陛下有提問之旨撫按疏入則陛下有庇護之旨是陛下所信者在該監而所疑者在撫按也將置撫按於何地矣臣在吏言吏故敢冒昧陳愚因論內之爵廕并及外之紀綱若此誠以不忍重負陛下拔置禁掖鴻恩而隱忍緘默自

愧言責用是卽犯雷霆之怒斧鉞之威亦有所勿顧也。疏入帝不納得旨罰俸半年。

疆事焚棟可虞等事疏

題爲疆事焚棟可虞朝議築舍未決乞敕閣部大臣立斷大事毋持兩端以誤邊誤國事伏念臣以草茅初進罔識忌諱仰干聖怒荷蒙日月之照天地之寬不加顯誅姑示薄罰臣方戰慄未已何敢復有所言顧臣再思之皇上置耳目侍從之臣豈徒使唯唯苟容取充位已哉臣若不言是濁職也是畏罪也且重負皇上震威之盛德矣臣請冒昧言之今海內用兵所在騷然而最急者莫如薊遼九邊開釁無處足恃而最吃緊者莫如薊遼之總督自督臣王象乾以難聞蓋兩月於茲矣長安雖兒童走卒皆知此地此官一日不可缺并一日不容緩乃廷臣方議推而督師輔臣忽議裁今靜聽又二旬矣而啓事杳然夫輔臣豈真欲裁督臣哉欲裁督臣則必如臺臣黃尊素疏稱直任到底而後可然薊遼正有事之日也督臣非添設之官也無事猶設有事則裁臣同官程註一疏洞中肯綮業已奉旨矣而調停觀望者謂何豈登萊之撫臣不可裁而薊遼之督臣乃可裁乎倘謂督師輔臣意難重違則臣又有說焉從古自任任人事無兩可臣讀輔臣前疏有云居密不居東者勿推任撫不任勦者勿推同功不同過者勿推以及畏勢要顧局面愛便宜者勿推則是輔臣胸中再四熟籌明明有一當推之人際此呼吸存亡之秋輔臣何不直告於皇上所謂不自任則任人可兩言而決也而臣因是益不能不責望於今之閣部大臣矣遼左一事旣以戰守二字斷送封疆復以防撫二字停推總督茲何時也喜峰口入犯之報猶曰傳聞而韓宗功等之

奸細則現獲有據萬一闖入內地雖朝推督臣夕往受事其何能及此真可爲痛哭長歎息者也而欲爲廷推計亦自可兩言而決何者疆場事大情面爲輕直當問其人之堪任與否更不當問其人之肯任不肯任也嗟乎年來卿寺填滿幾無坐處而遼撫缺出必借才於外臺今司馬之堂累累若若而危邊重寄動稱乏人豈一時雅負物望諸臣以之折衝樽俎則有餘而以之禦侮封疆則不足不亦重負明主之知遇而虛糜國家之爵祿也哉臣共居漏舟之中未見衣枷之戒漸處覆巢之下不聞戶牖之圖輒不勝杞憂緯惄痛言至此伏乞皇上毅然獨斷或敕督師輔臣自擇總督或敕閣部大臣立刻會推務令過往該鎮與舊督臣交代庶撫局可終防著亦固彼卽有叵測之謀我自有預備之策而嚴關號覩景象目前得少安矣疏入得旨報聞

聲罪之罰未彰等事疏

題爲聲罪之罰未彰敍功之賞日濫懲乞聖明惜名器以勵人心事臣惟治天下之大權無過賞罰而已罰不嚴則法多凌夷之患賞不嚴則人生微倖之思張裔之稱諸葛亮也不曰刑不可以貴勢免罰不可以無功取乎蓋刑印不足成事敵寇必待有功賞罰二者誠不宜偏輕重而以觀今日之朝廷何其罰有佚而賞太僭也天驕日逞於塞上而未能效犁庭之舉夜郎自雄於海中而未遑興問罪之師國威至此亦大衰矣然猶曰彼勢方張而我力未逮耳至若逃兵逃將之律何不一切無赦使知國有常刑驅官驅餉之奸何不直窮到底使知法無漏網臣恐自此以往貪夫儕帥惟知剝軍肥己擾青蚨以自娛惰卒驕

兵誰肯臨敵忘身觸白刃而不顧哉其究國家卽欲以罰隨其後亦無及矣而賞則有不可勝言者陸贊有言當今所病方在爵輕設法貴之猶恐不重若又自棄何以勸人由今而觀爵賞濫觴何以異此腹裏而猥稱邊俸守土而競言軍功於是前者收逐鹿之利後者動見獵之心狂瀾一決不可復止而近日中州敍功一疏撫臣馮嘉會又已加銜廕子矣往歲妖民竊發兩河赤子非無震鄰之驚然未若二東有屠城略地之慘也銷萌望釁雖有勞勳亦撫臣職分宜然豈曲突徙薪之功必當與焦頭爛額者同日而語而敍其身又及其子毋乃太濫乎況死守孤城之朱燮元躬冒矢石之王三善協力進勦之何士晉猶必待事平優敍而嘉會先叨此廕賞之典其何以使蜀黔粵軍中不人人解體也臣非不知成命已頒亦非有所求多於嘉會但長此不已後將安窮然則浙之葉朗生吳之陳鼎相先後就擒亦可以戡亂稱功甚之貪財激變遷國圖存之李標公案稍冷熱中猶存恐未必不耽耽焉冀論功而脫罪矣惟名與器不可以假人臣待罪吏垣封駁無能然豈敢不爲朝廷名器惜而不一糾繩之哉抑臣於此而有感於刑罰之不明也反坐一律平民誣告且然況上而越奏者乎科臣朱大典糧事已明則舉人鹿之麟罪案已定乃置其首而坐其從恐所稱刑不可以貴勢免者殆不如是也臣故因論賞罰而併及之伏惟採擇施行疏入得旨報聞

### 慎起居以保聖躬等事疏

題爲慎起居以保聖躬容直諫以明天變事臣聞君者天之宗子也故君之一身乃天所託重之身必重

視其身毋一念屑越一事戲豫而後天心之眷顧益隆蓋從古人文之能敬天者未嘗不自側身求道得之也我皇上勵精爲治從諫如流二三年間河清鳳見天人相與之際感應不爽庶幾其中興之美乎乃邇者風霾晦日地震湧川自蟄穀以及近畿所在告變而聖體違和適與時會一時中外臣工不無惶惑未幾臨軒視朝聖容睭穆數日以來天清地寧聖作物睹人情又無不恬然愉快矣而臣杞憂嫠恤猶不忘瞽誦仰佐宸箴曰慎起居曰容直諫毋乃迂而不切於事懶而不切於時乎然臣言雖懶而非迂也請得而誦言之皇上天縱精神日升川至偶爾靜攝容何傷而臣所深憂者正此無傷一念也臣讀漢史袁盎有言千金之子坐不垂堂聖主不乘危不徼倖夫漢文帝恭默思道之主也而盎爲此言其防之深而憂之遠矣今皇上固可爲堯舜陋漢文於不足尙者臣知一舉念必不敢有所屑越一舉動必不敢有所戲豫要使深宮宴閒之時常若細旃嚴密之地一切伐性之謀蕩情之具不得伺隙而投乘間而中斯清明在躬志氣如神宗廟社稷之身有泰山磐石之慶矣臣所謂起居宜慎者此也臣又讀漢史本始四年地震是時郡國四十九同日震宣帝詔問經學及賢良方正之士因釋直諫夏侯勝等爲諫大夫地節三年地震復詔求直言有曰乃者地震朕甚懼焉有能箴朕過失以匡不逮其母諱夫漢宣帝弱齡嗣位因變求言竟成中興令名又況我皇上幼冲踐祚聰睿天成度越漢宣萬萬者乎前者諸臣因地震上言類得嚴旨不勝駭愕雖聖躬方在靜攝罪以昭瀆其亦何辭然諸臣所言一一皆忠愛之言也願皇上從此推漢宣求言之心明詔在廷臣子勿以近日一二譴罰爲戒寧作對仗之馬毋效抱葉之蟬務期極言過

失於此永消災異共答天心至於被逐言官如毛士龍等亟爲賜環毋使夏侯勝得嵩美於前史可也臣故謂直諫宜容者此也抑臣於此不能無望於閣臣矣宋神宗時以災變減膳撤樂王安石言災異天數非關人事得失富弼嘆曰人君所畏者天耳若不畏天何事不可爲將使輔弼諫諍之臣無所施其力是不可不速救然則今之閣臣將爲安石乎將爲弼乎此際止宜以保身敬天納諫用人爲責難陳善之第一義恐非區區素服角帶足了修省之故事也敢不避愚懶而并及之疏入得旨報聞

### 革職貪臣巧附名賢疏

題爲革職貪臣巧附名賢大干清議乞敕法司拿問以儆官邪以存國法事臣辦事本科見原任御史今爲民徐縉芳一本爲遵奉恩詔控陳異冤事奉聖旨徐縉芳已經詔赦不得又來奏辨該部院知道欽此臣不勝駭愕何物縉芳魑魅魍魎敢晝舞於青天白日之下也豈未聞近日吏部飭法懲貪之覆疏乎凡撫按參劾有司臚列多贓者不拘年力資格拿問追贓以三七爲率一年不完聽部科參處業經奉旨申飭矣有司如此況御史以風憲犯贓者哉縉芳作令江南穢聲久著乘驄淮上醜態愈彰蓋當年手書之露蹤與爰書之列狀鑿鑿有據得免荷戈倅從褫斥茲姑不必再汚白簡臣所深恨者則縉芳疏中所稱上書爲顧憲成別白生平遂觸世網等語臣始不得不直折其奸矣憲成臣鄉之賢者也生平自在何待別白且縉芳自視爲何如人而代憲成別白耶憲成有知當不瞑目於地下矣尤可異者陽借恩詔陰遂私圖而且一則曰臣不敢因皇恩之浩蕩徵廟堂之寬政也再則曰臣決不爲顧破飯燃死灰計也夫巨

萬之賊孰非民間膏血。一旦肆赦遂令網漏吞舟廟堂既已寬政矣。更欲何寬乃敢肆無忌憚曰聖朝不宜有不明不白之刑章。臣子不宜有不明不白之公案。其詞若有深憾焉。然則必使縉芳破餽復完死灰再熾而後釋憾於聖明乎。甚矣縉芳之膽包身而罪通天也。聞縉芳匿影都城暗希打點臣非不知其腰纏十萬百足不償必至錢可通神毒能射影然臣生平疾貪自爲司理已然況待罪吏垣敢不如鷹鵠之逐使貪夫敗類翩翩其來爲聖世清明之玷也。伏乞敕下法司緝拿縉芳追賊正罪投畀有北毋令天下嘆赦者小人之幸并爲後來貪吏嚆矢地未必非今日飭法之一大首務矣。疏入得旨報聞。

吏治日擾等事疏

題爲吏治日擾民生日囂乞敕所在有司以收拾人心爲第一義毋徼功以滋亂事臣聞天下之大勢靜則治動則亂天下之人心與之以靜則各安其性命而不肖之心銷擾而動之則人將自危而寢成其瓦解之勢夫民顙愚而易犯法者性也麗於法而治之治之如其人如其法而止而民乃安然不驚一或濫觴於法之外株連其人之餘而愚民始惶駭眩亂喪其神魄求解免於須臾之死而無端之牽引遑造之風波起矣燭火燎原蟻穴潰隄所當深懼故治天下者慎無動之屬者遼左之訌也其初繩之急而備之疎視以折箋可使而不料其伏屍流血也此擾之過也蜀以徵兵擾而永寧叛黔以襲替擾而水西叛齊魯以牛車擾而鄧勝妖黨叛今日國家兵甲四起兵民交困事事以擾致之乃者遼民之僑居登萊也而幾又以奸細之言擾矣幸而明旨煌煌消其隱禍則亦社稷之靈也若東南浙直之交羣涓輩以恫喝脇

人財而富家兒率多慾狂不檢大言易信而務外不根之人易投然而實非有斬木揭竿之勢也比於盜賊盜賊死而比於妄男子則妄男子死耳死如其法死固無怨罪如其人人亦勿驚如指龍華蛇山名色而必欲一網以包羅之恐江淮吳越之間愚者駭智者疑弱者懦勇者譁人無樂生之心而蠢蠢有累卵之勢此亦今日閏十八字吏以鉤距爲功名嗟乎天下豈堪再擾也夫民未亂而喜事者若恐其不亂及至亂形見而束手無可奈何則又安若靜治不擾而共享太平之福爲得策也臣俯察天下之大勢不幸什九類此私憂過計惟望諸輔臣靜以持之於上勿令羣有司動而擾之於下庶其無速亂乎而首輔葉向高且屢疏求放矣夫天下方擾擾欲動非首輔功成身退之日也宋元祐間司馬光已得疾因青苗餘法猶在西夏亦未寧嘆曰四害未除吾不瞑目矣詔光肩輿三日一入省光謝不敢當乃令子康扶入對是古之大臣未嘗堅拒詔也今遼左淪亡黔蜀多難何如西夏年來加派頻仍海內虛耗司農仰屋至奪長吏之秩而民間殊不堪命又何如青苗餘法且首輔之病未必如光而我皇上溫諭敦留不啻如元祐故事首輔獨漠不動念乎而令光專美前代耶臣因蒿目治亂而轉及此乞敕首輔立出視事弘濟時艱至於吏治宜靜毋擾臣芻蕘所獻倘聖明以爲可採仍敕下吏部覆議申飭施行則天下民生幸甚疏入帝從之

### 君側不可不清等事疏

題爲君側不可不清英斷不可不決乞聖明割恩正法以消禍本事臣歷觀漢唐宋以來未有不以宦官

弄權禍國者。漢時鄧通方愛幸。一戲殿上。丞相申屠嘉得而檄召論斬。其後侯覽王甫輩朋結趙燒。操弄國柄。太傅陳蕃身且不免。釀成黨錮之禍。而漢始不振。唐時閻興貴干預外事。李商隱一長安令耳。卽收繫獄。事聞召見。宣示百官。其後王守澄仇士良輩專制國政。勢傾中外。平章宋申錫李德裕相繼獲罪。卒致甘露之變。而唐遂以衰。宋時任守忠離間兩宮。左僕射韓琦坐政事堂。出空頭敕召之。安置遠州。其後童貫梁師成輩竊弄兵權。雜出詔旨。而執政如蔡京王黼。復相與表裏爲奸。故都人一目之爲姐相。一目之爲隱相。而宋祚竟移。若是乎此輩之禍人國也。殷鑒不遠。聖明在上。豈意有大逆不道跋扈無禮。如副都御史楊漣所劾之東廠太監魏忠賢者。漣疏臚列備悉。臣不必再爲更端。皇上試取其疏。而一審閱之。如內外盤踞。曖昧交通。鵠廄蠶蠶。羊頭狗尾。視漢之朋結趙燒者。有以異乎。如索廷推之制奪金吾之秩。停黃門之遷。以及冤斃青衿之命。生殺予奪。盡在其手。視唐之勢傾中外者。有以異乎。又如內操烏合。憂在蕭牆。中旨濫觴。斥及忠鯁。至於道路傳聞。實繁有口。甚有爲臣子所不忍斥言者。視宋之典兵矯詔。謀間兩宮者。有以異乎。是忠賢之身。乃合侯覽王甫王守澄仇士良童貫梁師成任守忠諸奸而爲一人。至其僭擬陵寢乘輿等事。又漢唐宋前代所未見。蓋不赦之法。無將之誅。更爲過之。而區區鄧通閻興貴。不足相比數矣。臣意漣疏一入。皇上必赫然震怒。立賜處分。庶幾稍洩通國之憤。乃漣疏竟奉嚴旨。而忠賢疏且先取溫旨。旣念其積勞任事。又慰其小心供職。臣始不勝駭異。臣不知奸逆如忠賢。何者爲任事。何者爲小心。而侈口懸直。尤屬欺罔。且皇上亦知忠賢之所以不置辨乎。自知罪狀難欺。欲辨而不能辨。

也。皇上亦知忠賢之所以求自罷乎。自知國法難逃。欲不罷而不敢不求罷也。皇上英斷天成。亦可以蚤決矣。宋臣有言。大臣不言。故小臣言之。今漣大臣言矣。而皇上猶未斷自淵衷。臣雖小臣。又安敢畏罪而結舌不言哉。臣恐自此以往。大小各官真知有忠賢。不知有皇上。萬一忠賢大奸大惡。日甚一日。更有進於漣疏者。亦皆觀望絀嘿。以遵旨爲戒。不發一言。而皇上乃真孤立於上矣。惟言莫違。聖有明訓。皇上獨無懼乎。臣非不知忠賢口含天憲。股弄廷臣。漣疏無如之何。何有於臣。然臣承乏言路。目擊忠賢積惡貲盈。天特假手於漣。以暴其罪。而仍令網漏吞舟。實國家治亂安危所係。故繼漣之後。昧死上言。伏乞皇上毅然乾斷。毋以忠賢一人。而杜天下忠愛之口。此一舉也。臣知諸輔臣必勸皇上割恩。必成皇上正法。當不令申屠嘉韓琦嵩美於前矣。疏入得旨。以稱引古今不類申飭。

微臣因事納忠疏

題爲微臣因事納忠。敬推廣列祖徽猷。乞聖明每事紹法。以臻盛治。事邇者。恭遇皇上將幸國學。一時都下士民。欣欣相告。謂再覩辟雍聽講。冠帶圜橋之遺。臣亦雀躍私頌曰。若是乎。皇上之法祖崇儒稽古。不倦也。蓋自神廟登極。四年視學以後。僅見此舉。雖偶以聖躬微恙。傳諭改期。而鄭重大典。擇吉另行。聖心敬慎。一念中外共仰。傳之史冊。於爍哉。祖孫濟美。光昭千古矣。臣因閱皇明寶訓大政諸書。誦揚祖烈。伏念可爲皇上今日法祖之要者。謹條爲八事。敢冒昧以進。而無諱可乎。臣查洪武六年上諭。儒臣詹同曰。朕思聲色乃伐性之斧斤。易以溺人。其害甚於鴉毒。創業垂統之君。爲子孫之承式。尤不可不謹。同對曰。

陛下此言誠子孫萬世之法也。是時上已生十二皇子矣。而慎戒聲色若此。今皇上雖春秋鼎盛。而血氣未定。亦聖人所戒也。況離照當陽。前星未耀。聖躬萬年有道之長。聖子神孫萬年瓜瓞螽斯之慶。關係綦重。得無聲色在旁。有如祖訓所稱鳩毒易溺者歟。此皇上之宜法祖一也。嘉靖六年。上因大學士楊一清等請。儒臣進講大學衍義。上曰。令直解參以時事。以開朕學。又一日。諭輔臣曰。朕見顧鼎臣所講洪範。盡心指解。詞語多長。恐有失記。著少刪幾句。從容講說。發明朕心。蓋世廟留心典學如此。所以英斷萬幾。成中興之令名。今日講帶星而入。日出而罷。講官片晷開陳。不知能盡心如鼎臣否。而一切重大時事。上關主德成敗。下係國是。定傾。曾聞參解一二。如祖訓所謂開發者乎。此皇上之宜法祖二也。弘治十八年。上召大學士劉健等至煖閣議政事。上袖出數疏。指一揭帖曰。此巡按御史所奏地方盜賊事。須加緊鎮巡。官又指二疏曰。此科道所劾兩京官作何處置。又指一疏曰。此太常寺欠行戶錢鈔。昨有旨查部覆未明。須別爲處置。可見孝廟用人理財。及四方盜賊水旱。無不事事諮詢。乃下所司施行。今國家多事。倍宜勵精。皇上視朝之暇。獨不可一倣煖閣故事。召對輔臣。商確大政。俾親承裁決。而後奉行乎。此皇上之宜法祖三也。宣德六年。上諭六科給事中曰。爾官近侍職在記註。凡朕一言一令。內使傳出者。當備錄覆奏庶防欺蔽。不然必有詐僞。蓋祖制防微。有深意存焉。今中書爲政本重地。乃票擬大權。已拱手而授之內廷矣。每有傳言。動成鬧市。絲綸之體掃地。中旨之燄薰天。雖司封駁者。莫得而執奏焉。其何以杜欺僞乎。此皇上之宜法祖四也。永樂四年。有上時政者。都御史陳瑛。劾其狂妄。請置之法。上曰。草野之人。不知忌諱。

勿以直而廢之。又諭尙書鄭賜曰。拒諫之事。明主不爲。瑛非助朕爲善者。卿等戒之。大哉王言。真求言若渴哉。今章奏一路。非不批答如流。然歷數卿寺。詞林言路諸臣。建言謫降。歲不乏人。予玦經年。賜環無日。近部曹萬燝一言觸忌。可憐又以杖下之餘魂。化爲萇弘之碧血矣。短言者氣而重損聖德。如文皇帝不罪直言之意。何此皇上之宜法祖五也。洪武二十年。詔焚錦衣衛刑具。先是官民有犯。俱屬法司。其有罪逮至者。間令收繫錦衣衛用事者。因以非法凌虐上怒。遂有是命。此卽天地好生之心也。今廠衛人犯。一奉打問之旨。楚毒備嘗。年來復盛。用立枷。士民槁項而立斃者。不知凡幾。冤鬼哀號。道路側目。近廷杖之。端漸至流毒搘紳矣。不重拂高皇帝好生一念乎。此皇上之宜法祖六也。萬曆十七年及三十六年。蘇松等處水災。上憫江南重地。自糧米改折蠲免外。又存留歲造綏四等銀。以備賑濟。一二子黎賴以全活。誠浩蕩之恩矣。年來蘇杭織造一事。撫臣爭之不得。杜門求去。科臣駁之不得。挂冠以行。今商羊爲祟。遠邁昔年輔臣疏請蠲賑。而亦以減織造爲言。蓋念三吳杼軸其空。饑荒薦至。嘔心爲國。良非得已也。皇上何不近按皇祖成例。俯從閣議。稍寬東南今日之民力乎。此皇上之宜法祖七也。洪武元年。上論宦官不得典兵。謂侍臣曰。吾觀史傳所書。漢唐之禍。雖曰宦官之罪。亦人主寵愛使然。向使宦者不得典兵。雖欲爲亂。其可得乎。三復此諭。慮蓋深遠矣。今禁旅日繁。內操未罷。寄狼虎之蹤於蕭牆之内。聚金革之氣於心腹之間。此舊輔葉向高所謂今日似無可慮。而他日終屬隱憂者。近去國餘忠。又惓惓以暫輟爲請矣。皇上猶未動念乎。則國初典兵之禁。何不一深長思也。此皇上之宜法祖八也。臣非不知隱默足以容身。不

宜冒瀆天威。然臣伏見臣同官陳惟新一疏。奉旨有云。言官有真心爲國條畫實政的。自見採聽。又云。但不得空言沽直。借事邀名。臣以此知聖心覺悟。捷於轉圜。原未厭薄言者。臣茲條上八事。皆祖宗奕世徵猷。方冊犧然具備。非空言也。倘皇上景行前烈。事事設誠致行。無疆令名。還歸皇上。臣亦無直可沽也。臣一念樸忠。用是不避狂瞽。因視學之後。敢以法祖爲規。竊自託於宋人曝背之誼。如此。惟陛下少留意焉。疏入留中。

計吏首重懲貪等事疏

題爲計吏首重懲貪獎廉必先旌異。乞敕當事諸臣。慎舉卓異。以勵庶官。以光大典。事臣惟國家三年一計羣吏。蓋倣虞廷明試之典。於以慎考課。嚴黜陟。至公也。近經科道列款上陳。部院奉旨議覆。無不以懲貪爲第一義矣。官邪日甚。賄賂日彰。自部科摘發。饋遺度一時中外。人情又無不毛骨俱聳。肺腸盡換。庶幾觀清明世界矣。尙臨期貪贊成風。竈竈不飭。自有拿問追贓之例在。蓋貪吏處。則廉吏得以自見。如阿大夫烹而卽墨始封。從來賞罰互行。不少錯貸。然則廉吏又何不可爲也。顧獎廉則莫如卓異一節。向來雖按故事。不一覈實。使僞廉者售。而真廉者反絀。臣竊憤焉。遠不具論。如天啓二年。吏部條陳卓異重守輕財。非不甚善。乃臣待罪浙中。見清介絕俗之劉可法。獨擯而不舉。臣至今惜之。今天啓五年。又屆期矣。該部斷宜申飭各撫按。一切上而藩臬。下而郡縣。必實實清畏人知。一介不取。若而人始以備舉。自非然者。卽力可排山。才能倒峽。勿畏牆壁。勿徇香火。輕以辱此典也。萬一外舉失實。而部院考察異同。科道風

聞參駁。卽以連坐舉主。庶贖鼎不至夤緣充數。而一二清廉有品者。得書名御屏。仰叨異數。其於輯瑞貢琛之役。不亦大有光哉。乃臣更有慨於中矣。計期在邇。部院相須。闕一不可。近清嚴秉正之孫璋。旣已騎箕而上升。忠憤嫉邪之楊漣。又且剥印而勿予。必得夙負丰標。力持清議。其人始克勝任而愉快。倘有人焉。乞靈於奧窓之間。而巧踞夫風紀之地。此其糊心不辨。涇渭猛氣更多。棚柴恐將來。大計黜陟關係不小。廷推諸臣可漫勿加之意乎。如臣言一得可採。乞敕吏部酌議施行。疏入報聞。

### 欲全元輔之體等事疏

題爲欲全元輔之體。當允司空之去。伏乞聖斷。以息煩言事。臣觀元輔棄向高。前後居政府數年。當皇祖朝。斷大疑定大事。如撤閩璫於磨牙。吮血之餘。出福藩於尾大。耦猜之際。豈不表表在人耳目間哉。迨事我皇上。適值東西用兵。加派日困。而又以票擬中移。平章失柄。心力俱竭。堅意乞身。章凡數十上。始得旨以去。去之日。猶多惜而留之者。而近何突來人言也。臣竊訝之。乃推厥由來。則坐工部尙書陳長祚之不去耳。夫元輔臣師長祚臣師之師也。臣何敢言。然長祚真老矣。古人七十懸車。長祚自視何如。略不引年乎。宜去者。一旦人言長祚者數數矣。耐彈不去。古有幾人。今人情實應且憎。長祚豈充耳不聞乎。宜去者二。有此二宜去而不去。於是一二言者。因長祚之不去。而轉咎元輔之去。不意皇上更因元輔之去。而未允長祚之去。臣恭繹明旨。有人言太逼。牽引座師等語。若因而遽允。殊非朕優禮老成。昧念元輔之語。是皇上若以長祚之留爲厚元輔耳。不知長祚不去。則人言不息。無論非皇上所以厚元輔之意。恐長祚今

日之所以報元輔者亦甚薄矣。長祚豈遂忘元輔行前欲其先去之言乎。臣愛元輔不得不愛長祚。且臣不得已而出此一言。勸駕歸山亦正臣所謂愛長祚之深思也。況長祚未去徒以陵工垂成耳。臣意長祚雖去而他日敍工有姚思仁之例在。長祚又何必棲遲不決甘以垂耄之身作衆射之的哉。伏乞皇上卽允長祚之去以謝言者仍罷斥臣以謝長祚并謝元輔臣言至此一切知罪有所不問矣。疏入帝不納。

輔臣失禮違時疏

題爲輔臣節節失禮已涉於慢口口違時更涉於欺謹據疏直糾仰祈聖鑒事先是輔臣魏廣微因臺臣胡良機指及枚卜一事盛氣而陳有時局不容等語夫輔臣平章天下何者謂局何者謂時臣已心異之日者頒歷不至陪祀後至一日之中再失禮焉臺省疏糾豈苛求於輔臣哉臣恭誦兩番溫旨雖輔臣事上無禮而皇上則始終使臣以禮斯亦臣子之希遇矣爲廣微者引罪束身可也引疾乞身亦可也而復滿口以時局爲辭臣讀其疏一則曰時局諸臣業得臣之隙再則曰乞加罷斥以快時局之心則大可異焉夫頒歷朝廷之禮也陪祀宗廟之禮也夫有何局糾其不至爲朝廷守禮也糾其後至爲宗廟守禮也夫有何局可快而乃以白簡爲兇鋒詆言官爲此輩不亦始而慢終而欺重無禮於皇上哉臣言及此輔臣必又以臣爲時局然臣惟不解時局二字故敢直糾其藉口違時以蓋其失禮之罪如此惟聖明少垂察焉疏入帝不納。

老成可惜等事公疏

題爲老成可惜。言路宜容，謹合詞籲天以存國體事。臣等因看議晉撫事，爲降用諸臣懇恩。此臣等六垣之言，非爲首一人之私言也。奉旨沈惟炳降用矣。臣等方相顧內愧，又見冢臣趙南星憲臣高攀龍，以此事相繼奉旨著回籍矣。臣等益不勝駭愕。何庸復言。已再思之，會推巡撫一事耳。國家未得撫臣之用，而以一人之言先失諸臣，又使宰憲二老臣一疏立斥，恐祖宗朝所未數見也。臣等捧誦明綸，雖曰出自聖裁，顧皇上從來禮貌大臣，優容言官，即如向日大小臣工，章滿公車，皇上未嘗以齒馬之嫌，謫及言官，而不意今日雷霆之怒，疊見摧折，并統鈞之地，風紀之司，不少顧惜，取一二老成人世所望爲歲寒松柏，百尺無枝者，速之去國乃爾。且朝廷進退大臣，應自有禮。若使部院之長，一朝咄嗟而去，有司庶僚攜手同行，身輕似葉，無論揆之國體，所傷實多。亦豈我國家數百年培養人才之意乎？至於惟炳承乏首垣，又以公疏獲罪，將令後之言者，且爲著樹之蘿，誰肯爲生庭之軼？且爲伏離之吠，誰肯爲立仗之鳴？其勢必至結舌相戒，不敢深言，而天下事乃可慮矣。臣等職掌所關，用是不避補牘，伏乞皇上從此親信輔弼，慎重絲綸，待大臣以手足之恩，任言官以耳目之用，將宗廟社稷實式憑之，而時事尚可爲也。疏入以瀆擾爲首者，降一級調外任用。



# 三垣疏稿卷二

兵垣五疏

追論通逆元奸疏

題爲追論通逆元奸。乞聖明明正其罪。以儆將來事。臣觀逆璫魏忠賢在先朝。猶然一閹豎耳。雖口含天憲。隱然有狐假之威。尙未敢飛而食人也。自奸輔魏廣微居之爲奇貨。欲借以倒翻世界。故相與表裏爲奸。欺罔熹廟。而一時小人之苟富貴者。輒壇坫奉之。於是甘心掃門。呈身入幕。實繁有徒。而忠賢羽翼成矣。臣嘗疏劾忠賢。因勗輔臣懇請熹廟割恩正法。而未引蔡京王黼往事爲喻。蓋以陰刺廣微。又以廣微疏辨失禮。藉口時局。語涉支吾。駁其欺君。廣微肺肝畢露。遂切齒恨臣。適值矯旨逐家臣趙南星。憲臣高攀龍。科臣沈惟炳。臣循職掌。公疏爭之。而中有著樹之蘿。伏離之吠等語。重忤權倖。復相與搆臣之罪於廣微。而臣乃得旨降調矣。臣去之後。言者以臣爲戒。廣微呼吸氣靈。忠賢驅除手竦。馴至公侯滿門。生祠偏地。馴至變亂祖宗法度。殺害天下忠良。馴至兵權利權悉歸閹宦。九邊漕運並置私人。幾年來有司搜括恐後。海內遂至空虛。邊臣貢諛爭先。封疆無一足恃。夫孰非廣微倒授太阿。使包藏禍心。圖危社稷。一至於此。我皇上旣磔忠賢。復研崔呈秀之棺。跪而斬之。以謝天下。至神武也。獨廣微奸訛之骨。雖寒而欺。

罔之罪未正。遂令當年入幕。巨憝改口。展辨硬冒鑿邪。今臺省交章。憤戎首之作俑。恨渠魁之漏網。皇上縱念大臣。不卽按以交結本律。亦望毅然獨斷。查照逆瑾事敗。奸輔焦芳等例。暴其罪狀於朝堂。褫其逆魄於地下。且以作將來大臣榜樣。毋令續薪傳之脈。開宵壬捲土之端可也。抑臣之去爲爭南星攀龍而去。南星攀龍之去爲參一呈秀而去也。今呈秀爲何如人。則南星攀龍爲何如人。覘見雪消水落石出。彼二臣者。蓋棺之論已定。易名之典宜加。又寧待臣言乎哉。嘉廟以此疏斥臣。荷陛下洪恩。卽以此疏復臣官。故不敢自昧其本末。而一申白之。疏入。帝從之。

論劾之冤宜雪等事疏

題爲論劾之冤宜雪。薦舉之濫宜澄。謹平心一言。以質公道。以存職掌事。國家設立言官。封駁糾彈。自有職掌。不得已而有薦舉。非其心也。蓋正直忠厚。雖當並存。而古稱諫官。必曰殿上之爭。仗下之斥。則糾駁之意居多焉。惟邇年逆璫用事。有承望中旨。首劾楊漣等。以快其私憾者。卽有借此立題。欲興大獄。以逐三案之異已者。於是每人分題。每題命意。某人論某人。某人論某事。讒言高張。忠良短氣。海內士夫。貶竄誅戮。殆無虛日矣。此等糾彈。其於職掌何居。而吏刑二垣。從無一言駁正。方且連章頌莽。極口美新。以賢書爲佞錄。以督學爲奉祠。甚至甘心從逆。不顧臣節。有爲華歆鄒慮其人者。舉祖宗設立言官本意棄若弁髦。此朝廷何等時哉。迨皇上鄭忠起廢。屢屢蘆明旨。而猶敢把持吏部。或明操線索。或力扼要津。相與詬其所忌。伸其所喜。先其私人。濫與賜環。以爲廢者未嘗不起。是以巧應明旨矣。後因物論譁然。始變爲

訪冊而無骨冢臣仰人鼻息直待戎政一疏折衷乃以臣等幾人塞責而其寫照處則在以被劾續查四字銅諸臣以遇缺銓補四字籠臣等且就幾人中不難將死作生占缺首垣不補資深之郝士嘗今尙墮白駒於空谷也沈應時一毫無罪積俸有年一番賜環祇博得一番投荒也是何逆璫欲超遷人則捷於轉圜聖主欲起用人則艱於轉石乎無怪乎言者憤憤略舉廢籍姓名入告皇上而借此徇私者紛紛薦刻致仰煩聖諭矣忤逆璫者薦附逆璫者亦薦矣爲逆璫所處者薦非逆璫所處者亦薦矣濫觴至今幾乎有舉無劾間有一二被劾最快人心而薦者又踵至矣夫由前論劾皆知爲逆璫爪牙也由今薦舉焉知不爲逆璫樹羽翼也乃欲護論人尙概擯被論之人且不覈所薦之人及還按薦人之人而賢路久鬱倖賀旁開則臣所謂其冤宜雪而其濫宜澄者恐亦剝復之機治亂之局也嗟嗟年來年例一推逆璫爲政吏部承行王鳴玉一疏和盤託出矣乃昔日例推中旨起用而妄竊賜環之名近日例推明旨起廢而竟絕賜環之望何悖謬也卽如蔣允儀彈王紹徽紹徽掌院卽以例推且授指門牆攻之削籍此其橫遭摧折又前此年例所無不當立補臺班竟其譽謗之用哉奉旨日久而啓事杳然該部不得不執其咎矣至臣生平硜硜在先朝未嘗妄薦一人祇因卓異太濫偶舉清介之劉可法爲之榜樣原疏自明而論者因臣一言波及可法豈知浙撫會推在趙南星與臣去國之後乎臣至今惜之悔之今又何敢爲年例諸臣丐恩亦第存此一段公道期不負皇上召還言路之職掌而已疏入帝從之

仰遵聖諭等事疏

題爲仰遵聖諭俯竭愚忠伏祈聖鑒以存職掌事本月十一日皇上躬御文華裁決政務臣於會極門候直侍班見同官章允儒等接出聖諭戒勉言官仰見皇上留心章奏念及屏斥諸臣懷忠欲吐亦旣聞言若渴矣又恐言者風聞失實甚盛心也臣因自反臣在先朝屢疏忤璫再劾奸輔魏廣微因獲罪以去比廣微初結逆璫臣微聞其事遂劾廣微不意其後果濁亂朝政流毒忠良迨蒙恩復還言路引焦芳例追論其罪荷皇上震怒奪其官是臣始劾廣微亦未始不出於風聞也臣謂言官入告以實誠不宜有風聞言事之心然臣誦高皇帝聖諭不云奏對之際或畏避不能盡其詞或倉卒不能達其意故嘗霽色以納之惟恐其不盡言也至於言無實者亦略而勿究乎文皇帝不嘗諭尙書李慶等曰彼所言過失若誠有卽因而改之豈非善德若果無之於汝何損罪之將重其名而益朕與汝等之過乎我皇上每事法祖而今有此諭臣恐傳之海內書之史冊妄謂皇上雖無拒諫之心而未免有厭薄言官之迹則臣之所深惜也且皇上謂大臣不安其位者爲輔臣耶冢臣耶樞臣耶近日一二言官雖不無指摘然輔臣固日直中書矣樞臣冢臣亦赴平臺召對矣南科臣已奉嚴旨冢臣復奉溫旨似亦可以安其位矣萬一以一人之言而槩責言官恐冢臣於心反有不安也且皇上亦念及當年魏廣微秉政周應秋秉銓崔呈秀秉樞之日乎彼惟先箝言路之口使畏罪不敢言而後乃相率媚璫幾危社稷今聖明在御人思靖共萬萬必無此慮而明主圖治當慎未然忠臣愛君必防其漸倘言官從此各以遵旨爲戒相顧不發一言後縱有廣微輩出復蹈前轍恐下有不及聞者矣則又臣之所深懼也至於言官持己不嚴官常決裂

實爲敗羣法宜嚴處惟是論人不當乃引反坐一律臣知聖心不過欲就人論人據實而言耳非真惡聞其言也何也以先朝誣劾楊漣等諸人亦未一一反坐也豈其寬於彼而獨嚴於此諒亦聖明之宜洞察而閣部大臣之宜深思者矣臣刀俎餘生感皇上錄之摧折之後復玷侍從之班臣條上封事半屬封疆杞憂未嘗妄有攻擊儘可緘默求容而踵頂鴻恩捐糜圖報竊慮皇上本以懸韜設鐸之盛心而令臣下或有箝口結舌之隱慮故敢昧死上聞伏惟皇上少垂聰焉疏入得旨昨發科道諸臣一諭正欲爾等今後有言務要捐去成心持平論議詎禁言者其中反坐二字係朕面語何得聒瀆不休妄生猜忖本當處治念係賜環姑不究該衙門知道

### 聖明望治甚殷等事疏

題爲聖明望治甚殷臣工敬事宜亟敢一言申儆以襄秦運事臣觀三代而下爲臣子者慨想唐虞之際每嘆有臣無君今恭遇皇上日御文華數舉召對一切講學勤政親賢遠奸事事必法堯舜有君如此何忍負之臣謹據膺見條陳可與廷臣交儆者有五敢盡言之而毋諱可乎一曰輔臣納牖宜勤書曰爾無面從退有後言若是都愈之朝不勝吁咷貴相成也今聖明天縱誠莫能及但股肱大臣往往將順意多弼違意少臣近讀記注有云朕與卿等商確或是或不是卿等須直言是上明以匡正望輔臣矣輔臣又何憚而囁嚅不盡乎恐責難陳善未可當聖世而失之也一曰言官論事宜平夫君仁臣直誠美談矣獨不曰多諷少諫乎今科臣廷諍過激致蒙擅斥宣付史館恐下受其名而上任其過臣甚惜之竊謂諸臣

有法言。自不可無巽言。無輕批鱗。自干霆怒。庶立仗之馬可免一鳴輒斥。而黃臺之瓜不至屢摘。欲稀將來傳之史册。無重貽皇上以逐諫臣之名。諒亦愛君者所同然矣。一曰銓部職掌宜明。祖制會推爵人於朝科道例得與聞。防欺蔽耳。近奉旨雖戒把持。而仍責省臣以不行參駁。聖慮深遠矣。臣謂銓部用人者也。科道論人者也。凡遇會推銓臣。須一意擔承。如啓事得人。科道循例畫題。不則有參駁之明旨。在庶言官不受把持之名。而銓部亦不得誣於職掌之實也。一曰法司讞獄宜確。國家設三法司。耑主折獄。若鎮撫司。不過以緝奸宄耳。皇上登極。詔焚錦衣衛刑具。可謂同符太祖矣。近法司以一二事比律未允。致啓聖疑。故張宣夏一案。始下金吾。不善奉行。聞先拿本犯。後赴刑科。補僉駕帖。豈不大違祖制乎。宣勅法司以後大小之獄。必以情。不得情者罪之。而皇上亦每事必付法司。毋使海內謂當明允之朝。而輕開詔獄之端可也。一曰大臣出處宜審。祖宗朝臣子乞休。允放有體。惟神宗垂拱末年。閣臣情面相徇。始有幾怨天恩者。近南司馬商周祚一疏卽放識者未嘗不服其高致。今何屢病而屢留也。夫倏而杜門。倏而視事。其於去就大節何居。況病非假託。便當勇退急流。若二豎原未作祟。而徒假一番溫綸。謝一番人言。則援而且止。勿欺之謂何。豈煌煌明旨。僅僅與七發同功耶。而司票擬者亦每借密勿之絲綸。爲人作留行文字。亦襲王言甚矣。以上五款。雖卑之無甚高論。總欲借在廷臣子。精白乃心。於凡論思補闕。共存一忠愛之心。折獄用人。各矢一公虛之念。而至於進禮退義。爲廉恥名節所關。尤不可纖毫苟且。期不負我堯舜之主而已。其於治平之泰運。倘亦不無小補乎。如臣言可採。伏乞聖明少申飾焉。疏入。帝嘉納之。

科臣被言咆哮等事疏

題爲科臣被言咆哮徵臣就疏駁正乞敕下會勘并敕南臺臣據實回奏以息紛囂事臣前月二十六日辦事本科卽聞科臣薛國觀突疏加臣臣候召對間隨奉明旨臣不勝惶悚據疏中橫誣臣以東林主盟結黨亂政而誅其心不過因臺臣袁耀然參及無可抵飾乃巧借申救同官章允儒爲口實耳臣敢述商確公疏數語平心折之先是舉行枚卜臣病註籍兼旬始終不聞會推冢臣可問銓司可問廷臣皆可問誰爲一手握定臣不受也後允儒奉旨處分偶劉斯疎等謂臣曰臺臣已擬有公疏墳中尙無定屬臣曰臣子處分總繇聖裁然衙門公疏亦相沿職掌也論科應吏科爲首論官應都給事中爲首盍與薛國觀商之以都給事中惟國觀在耳斯疎等遂別時沈惟炳并不在坐安有疏稿授之且云公疏則非私議也國觀爲首臣亦列名如臣爲首國觀亦列名者也臣在先朝曾以一疏首降處矣使果有疏何憚不言況臣豈不知國觀之爲人哉而必強其書名也若結黨亂政臣子大罪何可輕以加臣臣從廢籍蒙恩召還在兵言兵疏在御前有一不從國家起見者乎臣若肯結黨亂政則逆璫用事時何不可隨衆求容必屢忤奸邪抗疏去國今聖主勵精明時坦蕩又有何黨可結何政可亂卽如目前計典自有主察諸臣虛公諮詢雖惟炳不得而專何況於臣不過與臣同垣諸臣循例繳單何把持之有國觀試一自反昔與崔魏同朝衆危獨安有何品骨而反詆臣等之忤璫見逐者爲黨爲奸何其敢於欺我堯舜也二十八日恭候召對臣與閣可陞面質臣何嘗有國觀不肯上疏想要番局等語此臺省諸臣集文華門所共聽聞者國

觀亦可謂說夢矣。至東林二字乃書院之名耳。神祖朝顧憲成抗爭國本歸臥林下。曾講學其間。今其人與骨已朽矣。頃國觀同鄉臺臣楊建烈一疏言之甚詳。屈指講學時。臣尙爲諸生。有何主盟。臣猶記熹宗朝媚黨諸臣一網正入必硬坐以東林誅夷削逐殆無虛日。幸賴聖明顯忠遂良往者贈卹生者錄用臣雖謙劣亦濫賜環。回首縉紳慘禍曾幾何時。而國觀又忍以東林二字爲阱也。豈當年飮聞斯語。今魂夢中猶自不忘耶。若夫袁耀然與臣素昧平生。三千里而遙拜疏。豈因臣使耀然疏至道路喧傳。不獨臣聞之也。臣如主使耀然又肯吐露於國觀同邑閭可陞之前哉。況御史糾彈是其職掌。必懸坐以主使。則國觀在先朝參劾諸臣。又是誰爲主使乎。亦可對照而自明矣。臣就疏駁正不敢旁溢一語。聖明自有洞鑒。通國自有公論。伏乞敕下九卿科道從公會勘。臣是否結黨亂政。國觀是否說謗欺君。并敕袁耀然從實回奏。與臣曾否一面。其前疏曾否係臣主使。一一直究到底。庶是非明邪正辨而紛囂可息。計典不撓。臣即退伏獻馘。將終身頂戴聖恩矣。疏入報聞不必會勘。

# 三垣疏稿卷三

工垣六疏

## 流賊漸逼東南等事公疏

工科等衙門都給事中等官臣許譽卿等題爲流賊漸逼東南根本重地可慮懇乞敕部速議以安陵寢以固陪京以護運道事竊照流賊發難以來秦晉畿豫楚蜀無處不受其殘破良繇不蚤設總督逆扼之於河上致饑民從賊賊黨日繁縱橫四突莫可收拾耳今楚豫間復滿地皆賊傳聞且攻陷臣鄉潁州矣夫潁州固鳳陽之門戶也門戶破則鳳陽岌岌難保祖宗湯沐重地且陵寢在焉此時不知如何震動也雖有總漕臣楊一鵬移鎮顧兵不過新募二千餘皆市人耳鳳陽又無城可守無險可據何以控賊今兵從西北追賊必從東南走其勢然也少有不戒致犯我皇陵一杯土一枝木將祖宗發祥之自億萬世靈長之脈其謂之何是豈臣子所忍言哉亟當敕部於近調各兵將中抽五千人統以知兵一大將星赴鳳陽聽總漕節制往來策應力遏其姦豫入吳之路如是則陵寢可安也此外由楚入吳則安慶其門戶矣操臣馬鳴世標下特沿江汎口兵耳近見楚中諸臣疏稱賊已水陸並進則水營之兵當駐小孤設防誠不可不預至陸路從黃梅而來則風雨驟至一兩日可到我兵勢不能舍舟登陸雖有操臣移鎮安慶但

安慶新募兵不滿千器甲未利戰鬪未習何以當楚之衝亦當敕部於近調各兵將中抽五千人統以知兵一大將星赴安慶聽操臣調度水陸犄角力遏其由楚入吳之路如是則陪京可固也不獨此也江淮運道南北咽喉乃國家命脈所關一旦中梗於賊數百萬漕艘何由飛渡京師及關寧皆仰給於茲豈京抵爲不涸之府而嗷嗷者能免脫巾之呼乎且財賦半出東南凡京邊起解錢糧取道何地寧有神運鬼輸之術而太倉亦坐困矣言念及此不寒而慄知皇上自爲東南根本計遣將調兵又不待臣等之合詞籲天也至內行糧從除地方額兵外新調各兵自應照別省例將八年之額餉聽總漕及操臣便宜留用兵屬總漕者餉派廬鳳四府兵屬操臣者餉派應安六府就近起解軍前俟賊平銷算諒總漕及操臣實心任事必能釐餉不至虛糜蓋同是朝廷封疆而臣鄉爲陵寢陪京運道攸係更比別省不同臣等竊謂計臣明而熟於事者當不作秦越視矣臣等忝列言路目擊賊氛甚惡念國家根本重地不憚瀝血控陳不獨爲桑梓一身一家計而已也伏惟聖斷立賜敕部施行疏入帝從之

皇陵被燬等事疏

題爲皇陵被燬臣子痛心直發誤國之罪仰祈聖鑒事頃者賊氛南向震及皇陵諸臣交章尙無確據昨接該撫按揭則賊已焚燬明樓及享殿等處矣祖宗三百年來王氣鬱葱發祥悠遠之脈何堪盡付流賊之一炬臣思士庶之家丘壠樹木偶爲盜傷亦必飲痛無已況我皇上孝治天下者乎一聞此變撤講減膳修省不遑必自以爲負痛於祖宗矣顧皇上御極數年敬天愛民法祖勤政無一事可以致譴無一念

可以召災。何故天不悔禍至此。除撫按兩臣罪無可逃外。誰實司邦政。誰實平章軍國。臣於是不能不深恨諸臣之誤國也。臣摧指餘生。兩蒙召還。言路漫無獻納。上報主恩。值此祖宗怨恫。聖明震惕。臣若畏禍不言。誰當言者。且日來樞臣聞言。輒思卸擔。而輔弼大臣。炤常視事。絕未見有一人席藁待罪。仰分至尊之痛憤者。臣亦不勝髮指。請兩言直發其罪曰。樞臣固位失事。臣輔玩寇速禍而已。曷言樞臣之固位失事也。方賊在秦晉。早設一督臣。扼其渡河。禍止西北一隅耳。乃侍郎彭汝楠規避不行。恐推別督。則樞貳無色。樞臣遂囁嚅不敢議。設人有詰之者。則曰。政府不肯設也。蓋畏政府不得不并畏政府之私人也。迨賊入豫楚。汝楠被論。始議設督。而汪慶伯者。猶夫汝楠耳。因推及極邊之陳奇瑜。而鞭不及腹。又制於撫賊之一說。心持兩端。致以撫誤勦。而賊乃再蹂躪東南矣。皇上試查會典載。左右侍郎原備總督之用。何以久持不決。坐失事機。且旣設五省督臣。非爲勦賊而何。柰何輕信招安。釀成今日之決裂哉。樞臣卽欲諱其不以固位失事。不可得也。曷言輔臣之玩寇速禍也。蓋流賊發難幾年矣。流毒幾省矣。東南根本重地。陵寢運道攸關。增兵預備。不待智者而決也。昨春。臣鄉諸臣。早言及此。樞臣不悟。直至昨冬。東南震鄰。人心搖動。始有淮撫操江移鎮之疏。識者已病其晚。及奉旨。則曰。不必輒議移鎮。以滋惶擾。臣觀各地方。稍有兵力。賊皆偵探。不入其境。蓋擣堅難。而襲虛易。賊亦料之審矣。鳳陽何地。陵寢何事。皇上試查。樞臣具疏。在十二月下旬。使朝上夕允。嚴限移鎮。計數日報至淮上。必在正月初旬。撫臣畏明旨。亦必星馳駐鳳。去賊十五日至。鳳焚劫。尙有數日之暇。正堪整旅堵賊。不至禍延皇陵也。輔臣是何肺腸。而欲緩之。遂

視陵寢爲孤注耶。彼民間見盜賊蜂起，亦各思保有墳墓。何況皇陵爲聖子神孫億萬世靈長之自豐不當蚤爲呵護。乃今使樞臣以曾請移鎮爲藉口。撫臣又以不必移鎮爲藉口乎。輔臣卽欲諱其不以玩寇速禍，何可得也。臣在班行，與輔臣各止一而其於樞臣，且效有忠告。豈有意摘發，而目擊皇陵如燬聖心。如傷忠憤所激，一切不暇贖顧。伏乞皇上敕問樞臣不必設督之議。是誰主張。敕問輔臣不必移鎮之旨。是誰票擬。各宜明認。誤國之罪。今而後。賊氛作何掃蕩。東南半壁作何鞏固。毋徒索服角帶。區區循修省故事。庶可少慰祖宗在天之靈。臣卽言出禍隨。甘之若飴矣。疏入得旨。皇陵震驚中外。當事諸臣何所逃責。總督不輕議設。原爲難於得人。且恐開各撫諉卸之路。旣設不效。咎自有歸。前賊在鄆境。應淮江川等撫應否。遽令移鎮。況偵探聲援相機進止。卽於旨內嚴飭。何僅單摘一言。反爲弛玩開卸。該部知道。

剖質疏糾疏

題爲微臣疏糾，僅止於誤輔臣疏辨似涉於欺敬。因明旨再一剖質，仰祈聖鑒。臣居言路，浮沉日久，兼以母老，時擬陳情，因聽斥幽，未敢遽請。然於壇工敍及一疏略已入告，頃蒙倅免，方欲乞恩歸養，忽聞賊陷潁州，又聞賊焚陵寢，臣痛憤幾不欲生。且念堯舜在上，遵此古今希有之變，實罪由臣下，遂具直發誤國之疏糾及樞輔諸臣，臣疏語虛平，未知不必移鎮之旨係誰票擬也。己見輔臣溫體仁再疏引咎，亦自謂誤國已甚矣。但臣所不解者，稱引古人善則歸君，過則歸己一語，蓋古者惟君有過，臣引爲己辜，始謂之歸己耳。今臣云皇上敬天愛民，法祖勤政，無可致譴召災。輔臣亦云敬天率祖勤政愛民，自宜感和召

祥似謂臣言非誣皇上更有何過欲歸臣下豈封疆敗壞陵寢燬傷非輔臣玩寇之罪而乃欲爲皇上分過耶亦悖甚矣又見臣疏奉聖旨皇陵震驚中外當事諸臣何所逃責總督不輕議設原爲難於得人且恐開各撫委卸之路既設不效咎自有歸前賊尙在鄖境應淮江川等撫應否遽令移鎮況偵探聲援相機進止卽於旨內嚴飭何僅單摘一言反爲弛玩開卸該部知道欽此臣再三捧繹多所未明赫赫明綸若爲輔臣解嘲者臣職司封駁又安能囁嚅已也旨云總督不輕議設原爲難於得人夫會典明載兵部侍郎可付以提督之任何以稱難卽不得其人將付流賊於度外乎何彭汝楠被論又奉有任樞勤練不必苛求之旨乎既可以佐樞又不可以任督乎此臣之未明者一也旨云前賊尙在鄖境應淮江川等撫應否遽令移鎮臣查樞疏奉旨時豫撫玄默有闕二字官兵合剿一疏已奉有賊勢重大闕二字則賊闕二字止在鄖境矣豫鳳接壤陵寢重地竟當漠然乎臣未遠引昨年宣雲失警晉撫移鎮代州賊擾中州鄖撫移鎮襄陽蓋重封疆耳何楊一鵬移鎮鳳陽旨謂不必輒議豈陵寢反輕於封疆設當時移鎮而賊不至不猶愈於賊至而陵寢被燬驚及祖靈乎此臣之未明者二也旨云何僅單摘一言反爲弛玩開卸臣查樞疏稱賊走黃梅江南鼎沸折而入豫之江歸齊魯淮揚一帶騷然蓋專爲移鎮而請則不必移鎮一言政票擬中喫緊誤國處臣特爲拈出何云單摘至臣疏首言撫按兩臣罪無可逃又誰爲開卸乎臣不知逮問楊一鵬等之旨果盡由閣擬乎抑出聖怒獨斷乎如未必盡由閣擬則開卸之罪責在輔臣而豈在臣乎此臣之未明者三也臣草疏畢又見體仁罪狀自明一疏大都依傍前旨而設詞甚苦如不必設督自

認誠有是言。獨諱汝楠爲其私人耳。夫汝楠輩爲政府私人。通國皆能言之。非臣一人之浮言也。若謂不必移鎮。詞甚圓活。則更可異焉。王言如絲。其出如綸。輔臣獨不聞乎。況鳳陽何地。移鎮何事。柰何以圓活出之。圓活二字。模稜之別名耳。所望救時大臣。平章軍國。當直捷主張。毋持兩端。臣又安知輔臣胸中先有圓活二字。爲今日卸罪之地也。臣所謂欲掩其誤。似蹈於欺者。輔臣不已情見乎。詞哉。夫欺者。人臣大罪。臣何忍輕議。然輔臣不幸而有其迹矣。輔臣如翻然憬悟。請抒其蠹畫。宏濟時艱。除兇雪恥。毋再以貳貽君父。庶幾少贖前罪。誠如是。則皇上卽罷斥微臣。以謝輔臣。臣方將肉袒以請。又何敢置一喙也。疏入得旨。前旨已明。何得恣辨求勝。

究誤國之原疏

題爲聖心方在焦勞。臣言不宜煩聒。略究誤國之原。再祈聖鑒。日者臣目擊寇禍。兩疏誤國之罪。輔臣一辨一不辨。臣似可無言。且衆言紛囂。聖心必厭。因而謫及言者。臣若爲臣一官起見。臣更不宜復言。然臣有不敢不言者。臣前疏但陳誤國之罪。而猶未及究誤國之原也。何謂誤國之原則。票擬與封駁失職耳。臣查祖制。大學士一官。原以備顧問。至世廟而票擬之權始重。凡部院撫按。何事不取裁焉。何者。票擬固筆代天言。未可以己意參焉者也。故票擬得失。則理亂之關也。至六科給事中小臣耳。而祖制凡章奏必下科。其奉旨有未當者。皆得循例封駁。蓋取古有失輒諫之議。非重科臣也。所以尊朝廷而防大臣蒙蔽之漸也。故封駁得失。則又理亂之關也。而今何如耶。輔臣朝入暮出。非不曰勞。日取一二刑名錢穀等。

事瑣屑批駁。非不曰煩。但遇邊庭交証。盜賊縱橫。治亂安危所係。實未確有一言。俯折廷議。仰贊廟謨。卽如淮撫移鎮一事。既以不必二字速禍。復以圓活一語卸罪。此等票擬。不可謂不溺職矣。而尤可異者。則互相庇護。牢不可破之私也。如甲被言。則乙擬溫旨以慰之。乙被言。則甲擬溫旨以慰之。夫今日有君無臣。致釀寇禍。我皇上聖不自聖。方以不德引咎。而何於誤國之臣。不曰忠悃。則曰蠹畫。不曰絕私奉公。則曰宏濟時艱。臣不知時事至此。所謂忠蠹何在。奉公濟艱者何事。豈皇上有罪己之詔。而輔臣不當席藁待罪。乃侈口交美如此耶。若宣諭原屬特恩。數煩王言體已大喪。邇來聞有代爲請宣者。未知防於何例。得無敢於要恩。爲扶同飾罪之地歟。綸扉一席。有此護法。毋怪乎誤國之相尋也。至封駁之義。則於闕二字。然矣。臣先年在垣。猶見乞恩偶濫。雖經奉旨。間爲封繳。其他用人行政。一切邪正是非。未嘗不據理駁正。今無能如昔之封還。卽奉旨而駁者幾何。駁而蒙改正者又幾何。雖或事事出於聖斷。然皇上一日萬幾。宵旰靡及。輔臣票擬。豈無朦朧玩誤。如不必移鎮之旨。爲聖明偶不及察者乎。諸臣未聞一言救正。斯亦封駁之失其職矣。而尤可異者。則閣揭奉旨間未下科。不知始自何年。臣查凡係兵機重情。奉旨密封本章。亦必下科。而後送部。彼閣揭奉旨間未下科。獨不可明示廷臣耶。甚至被言具揭亦然。何更示人以不公也。倘有背公徇私等弊。六科又烏從而駁正之。臣故不揣狂瞽。惟願皇上取輔臣票擬。擇其重者。必詳覽處分。若一二言者。駁及輔臣。必察其言之當否。言而不當。無所逃責。倘言而或當。毋令互相庇護。重戮明綸。庶幾票擬封駁。兩得其職。則輔臣不敢終於誤國。而皇上數年勵精之天下。亦可撥亂而爲治。

矣臣此疏一出輔臣不知何如中臣顧臣無媚骨在先朝因觸姦輔落職以去況今事堯舜之主立譽謗之朝更何忌諱忍負我皇上而結舌不言哉惟皇上裁察 疏入得旨報聞

朝廷敕法宜一等事疏

題爲朝廷敕法宜一輔臣濁職宜明謹補牘再陳仰祈聖斷事臣聞帝王御宇所以磨勵臣工者法之一字而已矣若法行於小臣而不行於大臣法行於遠臣而不行於近臣雖帝王不能以治天下我皇上登極以來英斷夙成行法無所假貸往不具論就臣再廁班行伏見諸臣奉職無狀法在必懲固也卽一二言官論列執政語或激懾輕則鐫級重則謫處又重則究問若是其不少貸矣猶曰此庶僚也進而求之督撫大臣建牙未幾斥逐已及輕則鐫級重則褫職又重則究問亦若是其不少貸矣猶曰此邊吏也進而求之六部大臣體貌雖優譴責時有輕則鐫級重則褫職又重則究問亦若是其不少貸矣夫皇上之不輕貸諸臣豈過爲苛求哉亦曰寓敕法之意於課職之中耳若輔臣則以票擬爲職者也如淮撫不必移鎮之旨實實誤國亦實實誤陵乃藉口相機進止欲掩厥罪不知賊氛飄忽如風雨驟至與其相機而後進何如先事移鎮不致坐失事機乎當陵警初聞輔臣溫體仁等合詞引罪奉旨有云卿等佐理中書與經事不同夫曰不同則但有輕重之分不得置身事外明矣臣竊謂撫按有撫按之罪輔臣有輔臣之罪臣三疏入告無一語輕謂罷斥蓋以黜陟功罪在皇上獨斷而進退廉恥聽大臣自裁耳兩月以來輔臣安心入直退食委蛇今撫按兩臣已下詔獄且奉旨駁審矣而輔臣日入中書絕未有席藁待罪之意

得無謂此番禍及皇陵。經事之撫按法自難逃。爲輔臣者。佐理濁職。獨超然免於評論耶。而聖意淵微。亦未見顯有處分。或者以輔弼大臣。地近密勿。我皇上課職之法。至此而亦姑示優容也。臣嘗伏而思之。往年輔臣如劉鴻訓。錢龍錫。相繼遭戍矣。卽久歷邊疆之孫承宗。亦奉旨閑住矣。頃寇墮中都。火傷陵寢。實繇不必移鎮一語。階之爲禍。豈皇上課職之法。至今日之輔臣而頓廢哉。臣始終以爲玩寇速禍。輔臣焉得無罪。直在皇上之一怒而已。抑年來論輔臣者。當否非臣所知。然皆庇私納賄。一身一家之事。其於誤國猶小。獨此皇陵震驚。祖宗怨恫。聖心有在天之隱痛。臣諡有率土之公憤。此之誤國。更孰有大焉者。臣職難隱默。敢不避屢瀆。伏候聖斷。倘臣言無當。不得其言則去。臣之責也。仰祈皇上立賜罷斥。以爲言者之戒。若以臣實妄言。而仍使濫竽言路。則功罪不明。是非兩混。此亦聖明之世法之所不敢出矣。疏入。帝不納。

### 陵工宜敍等事疏

奏爲陵工宜敍。濫恩當裁。謹懇辭復級。并循職駁正事。臣近患痰暈。註籍再疏求放間。伏覩工部爲慶陵敍工。臣亦奉旨准復原級。臣不覺愧悚無地。因臣疏乞休。靜候愈旨。未敢控辭。乃昨復奉旨。隨著臣遵旨供職矣。臣豈敢覩顏仰叨。此無勞之敍哉。思去冬農壇類敍。臣曾疏辭。不蒙准免。復臣一級。臣已懃無報稱。茲先帝陵工。臣子奔走其分也。何敢言勞。且臣身非經事。雖從諸臣後偶。一相度估計。不過與同官郭九鼎諸臣等耳。非若部臣李遇知程紹苦心鳩率。鬚髮爲白。同官范淑泰。臺臣梁天奇。司官張一鳳等戮

力巡督。面目爲黑。有寒暑拮据之勞也。今九鼎等僅止頒賞。而臣獨蒙復級。臣不惟有愧於遇知等。并有愧於九鼎等矣。況部疏初敍。曾經駁查。經事久近。明旨昭然。臣竊謂既曰經事。則廷臣中除遇知等數人而外。恐指未可多屈。如臣碌碌因人。何敢貪人之力。以爲己勞。臣曾向部臣力言之。乃部臣誤而敍復輔臣誤而擬復。致明旨亦濫及不經事之微臣。不亦勞逸幾無分別哉。此臣反覆思維。誠難冒承。不容不瀝血辭免者也。伏乞皇上察其無勞。仍令降級自效。倘臣病且夕可痊。容體勉供職。或邀異日宥過之仁。則聖恩不濫。而愚分亦安矣。臣草疏間。又見吏部接出聖諭。輔臣溫體仁等以加恩晉少師等銜矣。臣因思慶陵皇考之陵。皇陵皇祖之陵。我皇上之孝思同也。輔臣前聞陵警。旣以職在佐理。未與經事者同罪。今敍陵工。又以勞在贊理。遂與經事者同功。傳之史册。將陵寢同而功罪異。得無謂朝廷之法。罰有佚而賞太濫乎。雖恩出自上。而輔臣清夜捫心。亦當自愧矣。臣方求去。不宜復言。但敍工係臣垣職掌。臣雖在病中。一日未去。則言責一日不可不盡。故輒因懇辭復級。而并及之。疏入得旨。許舉卿復級。已有旨。不得借端託辭。

## 明史本傳

許譽卿字公實華亭人萬歷四十四年進士授金華推官天啓三年徵拜吏科給事中疏言錦衣世職不當濫畀保姆奄尹織造中官李實誣劾蘇州同知楊姜侵撫按職中旨謂姜賄譽卿出疏停譽卿俸半年楊漣劾魏忠賢譽卿亦抗疏極論忠賢大逆不道視漢之朋結趙燒唐之勢傾中外宋之典兵矯詔謀間兩宮何異忠賢大怒又言內閣政本重地而票擬大權拱手授之內廷廠衛一奉打問之旨五毒備施邇復用立枷法士民槁項斃者不知凡幾又行數十年不行之廷杖流毒縉紳豈所以昭君德哉祖制宦官不典兵今禁旅日繁內操未罷聚虎狼於蕭牆之內逞金革於禁闥之中不爲早除必貽後患於是忠賢怒益甚會趙南星高攀龍被逐譽卿偕同列論救遂鐫秩歸莊烈帝卽位誅崔魏將大計天下吏奄黨房壯麗安伸楊維垣之徒冀收餘燼屢詔起廢輒把持使不得進引其同類譽卿時已起兵科給事中具疏爭吏部尙書王永光素附璫讎東林尤陰鷙詔定逆案頌璫者卽黨逆永光嘗頌璫治逆案陰護持之南京給事中陳堯言疏劾永光璫孽不當正銓席然帝方眷永光責堯言譽卿又抗疏爭於是都給事中薛國觀以己亦璫孽也遂訐譽卿及同官沈惟炳東林主盟結黨亂政譽卿上疏自白卽日引去七年起故官歷工科都給事中明年正月流賊陷潁州譽卿請急調五千人守鳳陽疏入而鳳陽已陷皇陵毀焉譽卿痛憤直發本兵張鳳翼固位失事及大學士溫體仁王應熊玩寇速禍罪賊在秦晉時早設總督遏其

渡河禍止西北一隅耳。乃侍郎彭汝楠避不肯行。及賊入楚豫。人言交攻。然後不得已而議設之。侍郎汪慶百又避不行。乃推極邊之陳奇瑜。鞭長不及。釀成今日之禍。非樞臣之固位失事平流寇發難已久。樞臣因東南震鄰。始有淮撫操江移鎮之疏。識者已恨其晚。及奉旨則曰不必移。劉達及給事中楊枝起相繼論薦。竟不果用。福王立。起光祿卿。不赴。國變。薙髮爲僧。久之卒。



中華民國二十五年十二月初版

\*D六二六八

徐

發行人 王雲五 上海河南路

印刷所 商務印書館 上海河南路

發行所 商務印書館 上海及各埠

(本書校對者黃文濶)



3  
4  
910